


# *MGA HEBREOHANON,*

## *KAPITULO SINGKO UG SAIS <sup>1</sup>*

 . . . sa—sa Basahon sa Mga Hebreohanon. Dayon maghisgot kita sa ika-7, bahin sa pagka-sacerdote ni Melquisedec. Ug pagkahuman maghisgot kita, gikan sa pagka-sacerdote ni Melquisedec, ngadto sa mahimayaong mga adlaw sa pagbayad-sa-sala, ug paglain, paglahi-lahi sa mga pagbayad-sa-sala. Dayon paingon na pud sa mahimayaong kapitulo bahin sa pagtoo, sa ika-11 nga kapitulo; ug sa ika-12 nga kapitulo, “Nga ginasalikway ang tanang kabug-at.” Ug sa ika-13 nga kapitulo, “Ang Eternal nga Puloy-anan nga dili binuhat sa mga kamot sa tawo; kondili gibuhat lang gyud, sa Dios, nga mao’y nagbuhat niining mahimayaong Puloy-anan.” Pagkaanindot gayud!

<sup>2</sup> Nalipay ko nga makita ang atong igsoong babaye dinha sa luyo, nga bag-ohay pa lang misulod sa panerbisyo. Nakita ko siya ug ang iyang bana. Kagahapon, nagpaingon kami, ngadto sa usa ka lugar diin . . . Abi ko og batid na ako sa matag gamay’ng suok ug kanto, ingon nga nahimo man ako kaniadto nga tigbantay sa pagpangayam dinhi sa Indiana, ug nagapatrolya sàb sulod sa daghang mga tuig. Mao nga suhito ako sa matag lugar. Pero hapit gyud kong nasaag kagahapon, didtong dapita kon diin sila, didto ibabaw sa kabungtoran, sa usa ka bag-o nga dalan.

<sup>3</sup> Ug adunay kanser sa baga ang maong babaye, ug walay pagduhaduha giayo gayud sa Ginoo ang maong babaye. Nangadto kami . . . Oh, ug kung unsa nga nahitabo kadtong tanan, samtang atua kami didto. Si Igsoong Roberson, ania tingali siya, karon. Nakita ko man gud ang iyang asawa, ug si Igsoong Wood, nga ania usab. Ug nagsakay kami niadto sa usa ka karaang trak, kami ni Igsoong Roberson, ug ni Igsoong Wood. Misakay kami niadto nga trak, mitungas didto, sa ibabaw sa bungtod. Ug didto klaro gayud nga gipakita sa Ginoo ang maong kanser. Ug nagtindog kami didto ug gitan-aw kadto nga mibiya sa maong babaye. Atua kami didto, ug nakita sa amo mismong mga mata nga mibiya kadto sa maong babaye. Ug gitawgan niadtong babaye ang asawa ni Igsoong Wood; ug gisultihan pud ko niya, nga nakaluwa kono ang maong babaye og itum kaayo nga butang. Ug ania gani siya karong buntaga, nagalingkod dinhi sa may luyo sa simbahan, siya ug ang iyang minahal nga bana, nga nagkaaduna og maanindot nga kahigayonan diha sa Ginoo. Dili ba Siya kahibulongan?

<sup>4</sup> Ug wala ko kahibalo nga ang . . . Dinhi, kasagaran, sa mga tawo nga ania dinhi, panagsa ra gyud nga mahitabo dinhi ang

mga panan-awon. Hinoon ako man kining panimalay. Ug, ang buut kong ipasabot, ang iglesia.

<sup>5</sup> Niadtong Dominggo, sa nangaging semana, atong... Pila man ang ania kaniadto nga nakakita niadtong lalaki nga naka-wheel chair? Buta, baldado na, ug dili na makapanghinimbang, tungod nawala na man ang maong ugat sa utok, ug misrender na gani sa iyaha ang mga taga Mayos. Ug—ug usa ka Katoliko nga doktor nga akong higala ang nagpaanhi sa iyaha dinhi. Ug sa wala pa ko mianhi para sa panerbisyo, naghatag na ang Ginoo og usa ka panan-awon mahitungod sa maong lalaki. Nasayod man mong tanan niana. Ug tuod man naayo gyud ang maong lalaki, pinaagi sa MAO KINI ANG GINAINGON SA GINOO. Kita n'yo? Ug pagkahuman nakatindog na, nakalakaw na pagawas, gikuha ang iyang wheel chair, og makakita na nga sama ninyo ug nako. Ug milakaw pagawas sa bilding nga ginatulod na ang iyang wheel chair, nga normal na. Ug ang ugat nga para sa panghinimbang... Kabalo mo, dili baya mo makatindog, kita n'yo, dili gyud ninyo mahimo. Ug ingon niadto siya sulod sa daghang mga tuig.

<sup>6</sup> Ug kagahapon sa pag-abot ko didto, ang maong babaye nagdamgo na diay nga nakita kono ko niya nga misulod, alas dos impunto, ug misulti kono ko nga “aduna siya’y kanser,” ug pagkahuman, “MAO KINI ANG GINAINGON SA GINOO, ‘naayo siya.’” Ug—ug pagmata niya, eksakto gyud kono nga alas dos impunto. Ug mikunsad ang Espiritu sa Ginoo, ug didto kadtong—kadtong iyang damgo, gihatag mismo sa Ginoo ang hubad. Ug naayo gyud siya dayon niadtong tungora, didto mismo samtang nagatan-aw kami. Pagka-kahibulongan gayud!

<sup>7</sup> Dili ko lang madumduman ang iyang ngalan. Unsa gani kadto? Unsay ngalan mo, igsoon? Walton, Igsoong babayeng Walton, nga nagalingkod dinha sa luyo. Mahimo ka ba nga motindog, Igsoong Walton? Buut kong mangutana nimo kung kumusta na ang imong gibati. [Nagaingon si Igsoong babayeng Walton, “Maanindot gayud.”—Ed.] Amen. Maayo, Maayo na gyud. Siya’y maayo gayud, nga gipanalanginan kita sa ingon-ana nga paagi. Busa nagalaum kita sa labing, madagayaon gayud, sa dakung pagpamuhat sa Dios.

<sup>8</sup> Ngani gililong kini kaniya sa doktor. Ang gisulti ra sa doktor nga “nagaginhawa siya kono sa usa na lang ka bahin.” Pero kung unsa kadto, mikuyanap na diay ang kanser ug gibabagan na pud niini ang pagginhawa niya sa niana nga bahin sa бага, nakita n'yo. Dili mo man gud makita ang kanser pinaagi’g x-ray, tungod kay usa ka selula man ang kanser, mismo, ug usa kini—kini ka kinabuhi. Ug inyong—inyong—kon inyo lang—inyong—inyong tan-awon ang kanser, pinaagi’g x-ray. Dili gyud ninyo makita kana.

<sup>9</sup> Apan, ang Ginoo gayud. . . Atua kami didto ug nakita kadto, sa amo, mismong mga mata. Nakita namo kadto nga milihok, ug nakita kadto nga mibiya, sa amo mismong mga mata. Busa, mapasalamaton kaayo kita tungod niana.

<sup>10</sup> Ug karon, iampo n'yo kami, niining semanaha, samtang wala kami. Ug ipadayon ra tingali ni Igsoong Neville ang bahin kon diin ako mohunong, para sa pang-gabii nga panerbisyo sa Miyerkules. Ayaw n'yo kini pakayasa, kining mahimayaong serye sa Basahon sa Pinadayag.

<sup>11</sup> Nasayod ko nga daghan na ang pag-ampo nga naihalad, ug kita—nasayod kita nga ginadungog gyud sa Dios ang pag-ampo. Mao nga kita, niining buntaga, gusto natong mohalad og diyutay lang nga pag-ampo sa dili pa ang pagbasa sa Basahon. Karon, ang si kinsa mang tawo nga may kasarang, makahimo man sa pagbasa sa Basahon nga nakaingon *niini*, o makaabli niini nga nakaingon *niini*. Apan ang Dios, lang, gyud ang gikinahanglan aron maablihan ang panabot, kay Siya ra man ang Usa Nga makahimo niini.

Busa atong iduko ang atong mga ulo sa makadiyut.

<sup>12</sup> Karon, Amahan, sa Ngalan sa Imong pinalanggang Anak, nga si Ginoong Jesus, mapainubsanon gayud kaming nagaduol karon aron isurender ang among mga kaugalingon, ingon nga Imong mga alagad, og aron nga manulti Ka pinaagi kanamo. Sirkunsidaha ang mga ngabil nga mamulong ug ang mga igdulongog nga magapatalinghug, aron nga maisulti ang Pulong pinaagi sa Dios ug mapatalinghugan pinaagi sa Espiritu, diha sa mga tawo. Itugot kini, Amahan. Hinaut nga kuhaon Niya ang Pulong sa Dios ug magministerio nganhi kanamo sumala sa among gikinahanglan, kay amo kining ginapangamuyo sa Iyang Ngalan ug alang sa Iyang kahimayaan. Amen.

<sup>13</sup> Karon, sa pagbasa niining buntaga, magatuon kita. Dili—dili kita magwali; kondili magtuon lang ta niining Basahon sa Mga Hebreohanon. Pila man ang nangalipay niini? Oh, nagkaaduna gyud kita og maanindot nga kahigayonan! Ug karon ato kining tun-an og ayo, nga Kasulatan sa Kasulatan. Kinahanglan kining. . . Ingon nga ang tibuok, tibuok Biblia nagatakdo man. Wala gyu'y ni usa ka Pulong nga mawala sa hustong bahin Niini, kung ang Balaang Espiritu ang magtakdo Niini.

<sup>14</sup> Bueno, miingon ang tawo, “Ginasumpaki kono sa Biblia ang Kaugalingon Niini.” Gusto kong makita kana. Mihangyo ko, kaniadto pang baynte-singko na ka tuig, nga makita kana, pero wala pa gyu'y si kinsa man ang nakapakita niana hangtud karon. Tungod dili man gud nagasumpaki ang Biblia. Kung nagasumpaki man gani, nan dili kini Biblia. Ang gamhanang, walay-kinutoban nga Jehovah dili man mahimong sumpakion ang Iya Mismong Kaugalingon, busa wala gayu'y panagsumpaki diha sa Biblia. Sayup lang gyud ang pagsabot sa mga tawo.

<sup>15</sup> Karon ingon nga diyutay'ng paghulagway, sa dili pa kita maghisgot. Bueno, gisulat ni San Pablo ang Basahon sa Mga Hebreohanon, para sa mga Hebreohanon. Misulat siya og usa para sa mga taga-Efeso, para sa mga katawohan sa Efeso, nga Iglesiang Cristohanon; usa pud para sa mga taga-Roma sa Roma; ug usa para sa mga taga-Galacia; ug usa sàb para sa mga Hebreohanon.

<sup>16</sup> Karon, namatikdan nato nga si Pablo, usa ka magtutudlo sa Biblia, sa sugod pa lang. Ato kanang nahibal-an. Nga siya napailalum sa bantugang magtutudlo, nga usa sa pinakabantugan sa iyang adlaw kaniadto, si Gamaliel. Ug siya'y batid gayud sa Daang Tugon. Hingsayran niya kini og ayo. Pero nahimo lagi siyang usa ka manglulutos sa dalanon nga mao'y Dalanon ni Cristo, tungod kay binansay man siya sa Daang Tugon sa ilalum sa mga magtutudlo. Tungod ang mga magtutudlo, kasagaran karnal man... nagalaum ko nga wala unta ako makasulti og bisan unsa nga dili-maayo.

<sup>17</sup> Apan, kasagaran, kung ang nabatonan sa usa ka tawo mao lang ang pagtudlo ug ang pamaagi sa mga tulonghaan, kasagaran man gud hinimo ra kana og tawo. Kita n'yo, dili kana dinihogan, tungod kay nahimo na man kanang doktrina sa usa ka tulonghaan. Aduna gani kita'y ingon-ana sa karon. Presbyterian, Lutheran, Pentecostal, tanan na niini nga mga tulonghaan aduna ma'y ilahang teorya, ug sagolan lang nila kini og mga Kasulatan.

<sup>18</sup> Ug mao gihapon kaniadto sa Daang Tugon. Pero, si Pablo, binansay siya og ayo, ug nasayran gyud sumala sa pulong ang mga Kasulatan. Apan, nakita n'yo, ang mga Kasulatan, bisan unsa pa nimo ka nasayran gayud ang mga Niini, kung dili buhion sa Espiritu ang mga Niini, kung ingon-ana ang letra nagapatay ra. Pero ang Espiritu nagahatag og Kinabuhi. Kita n'yo, kinahanglan Kining buhion, o himoong buhi, pinaagi sa Espiritu. Kung dili gani buhion sa Espiritu ang Pulong ug himoon Kini nga tinuod nganha kaninyo, nan intelektuwal lang ang letra. Mao kana nga aduna kita'y ingon ka daghang nagasugid nga mga Cristohanon sa karong panahon, o nagapamayahag ra nga mga Cristohanon, tungod sa intelektuwal ra nga panghunahuna bahin kang Cristo.

<sup>19</sup> Mao nga nahitipas pud kita sa, "Bueno, kinahanglan nga aduna siya'y mabati nga unsa man; ug kinahanglan nga aduna ka'y buhaton nga unsa man." Ug, oh, hisgotan nato kana tanan, pagkataudtaud. Kinahanglan kono nga makasinggit ang usa ka tawo. Kaniadto kinahanglan kono sa mga Methodist nga makasinggit, adisir nila maangkon kini. Kinahanglan kono sa mga Pentecostal nga makasulti og laing mga pinulongan, adisir nila maangkon kini. Ug, oh, uban pa kanila, ang mga Shaker, kinahanglan kono nila kaniadto nga mangurog. Oo. Ang kanhing... Kinahanglan kono nilang maglakaw-lakaw,

ang mga mga kalalaken-an diha sa usa ka bahin, ang mga kababayen-an pud diha sa pikas bahin. Kita n'yo? Ang mga Shaker. Dayon mokunsad na kono ang Balaang Espiritu nganha kanila ug himoon sila nga mangurog. "Naangkon na nila Kini." Apan dili gyud tinuod ang tanan niana. Walay unsa man nga Tinuod niana.

<sup>20</sup> Nagapuyo ang Dios diha sa Iyang Pulong. "Ang pagtoo nagaabot pinaagi sa pagpatalinghug, sa pagpatalinghug sa Pulong." "Pinaagi sa pagtoo kamo naluwas, pinaagi sa grasya." Dili pinaagi sa unsa man, kon nangurog man kamo, o nakasulti og laing mga pinulongan, o kung unsa pa man ang nahitabo. Wala kana'y unsa man nga kahilambigitan, man lang. Ang ingon ni Jesus, "Siya nga nagapatalinghug sa Akong mga Pulong ug nagatoo Kaniya nga nagsugo Kanako, adunay Kinabuhing Walay Katapusan. Siya nga nagapatalinghug sa Akong Pulong ug nagatoo," og nga gibuhi na nganha kaniya, "adunay Kinabuhing Walay Katapusan." Mao kana. Dili igsapayan kung unsa kanang gamay'ng butang nga ginabuhat mo.

<sup>21</sup> Bueno, dili man ko batok sa pagkurog, o pagsulti og laing mga pinulongan, o pagkurog, oh, nianang—nianang pagsinggit. Okey man kana. Maayo kana. Apan mga bunga lang man kana. Kita n'yo? Mahimo ko kamong hatagan og usa ka mansanas gikan sa punoan, pero dili ingon nga naangkon n'yo na ang punoan. Kita n'yo? Inyong. . . Mga bunga ra kana.

<sup>22</sup> Ngani ang pagpamakak, pagpangawat, paghuboghubog, pagpanigarilo, pagsugal, og pagpanapaw, dili man kana mao ang sala, mga bunga lang kana sa dili-pagtoo. Kita n'yo? Ingon-ana ang inyong—inyong. . . Ginabuhat mo kana tungod kay usa ikaw ka makasasala. Kita n'yo? Pero una usa gyud ikaw ka makasasala. Mao kana ang nagatukmod kanimo nga mobuhat niana, tungod kay dili man ka nagatoo. Kay kung nagatoo gyud ka, nan dili mo man buhaton kana. Dayon aduna ka'y gugma, kalipay, pakigdait, pagkamapuanguron, pagkamaayo, pagkamalulot, kaaghop, og pagpailub. Mao kana ang bunga sa Balaang Espiritu. Kita n'yo?

<sup>23</sup> Bueno nagkaaduna kita og diyutay'ng mga butang, diyutay'ng mga sensasyon, tungod kay misimang man ang tawo gikan sa karaang, matul-id nga dalanon sa Pulong. Ang Pulong ra gyud. "Ang pagtoo nagaabot pinaagi sa pagpatalinghug."

<sup>24</sup> Busa kaniadtong si Pablo. . . Gipili sa Dios si Pablo. Gipili pud sa tawo si Matias. Kaniadtong siya. . . Nanagripa man gud sila, pero wala gyu'y unsa man nga nabuhat si Matias. Nagapakita lang kung unsa ang gahum sa iglesia kaniadto, sa pagpili, sa pagpili og ilang mga diyakono, ug pagpadala sa ilang mga magwawali ngadto sa nagkalainlaing dapit. Pero karnal ra kana, sa makadaghan nang higayon.

<sup>25</sup> Pasagdi n'yo ang usa ka tawo nga magsangyaw sa kon diin siya pangunahan sa Dios nga magsangyaw. Gusto ko kana. Kung moingon lang gani ang mga tawo diha sa usa ka pakigpulong, "Bueno, aniyay usa ka maanindot nga simbahan. Kini nga igsoon nagpatukod og usa ka maanindot nga simbahan. Ug aduna kami'y paborito." Ipadala dayon nila ang maong tawo ngadto niini nga simbahan. Pero wala nila naamgo nga ginapatay na nila ang ilang mga kaugalingon. Kita n'yo? Sa sugod pa lang, kung moadto didto ang maong tawo, dili man siya makapulsi sa lugar sa maong lalaki. Ginahimo lang hinoon nila nga mapukan ang iglesia, tungod sa pagpakita og pagpasulabi ngadto sa usa ka paborito. Ingon na gyud niana sa una pa.

<sup>26</sup> Apan nagatoo ako sa labing hataas nga awtoridad sa lokal nga kongregasyon. Oo. Mao nga pasagdi n'yo ang matag iglesia nga magkaaduna og iyahang pagbulot-an, nga mopili og mga pastor niini, mga diyakono niini, og, unsa pa man. Ug kung ingon-ana, sa nianang paagi, ang pastor nga anaa dinha walay obispo nga labaw kay kaniya. Kon gusto sa Balaang Espiritu nga manulti og unsa man ngadto nianang iglesia, dili na nila kinahanglan nga mangutana pa sa kang bisan kinsa kung puede ba nila nga buhaton ang *ingon-ani* o buhaton ang *ingon-ana*. Ang indibiduwal kini mismo nga nagapakitagbo sa Balaang Espiritu. Ipakita n'yo kanako pinaagi sa Biblia kung unsa ba ang mas labaw pa, diha sa Biblia, kay sa usa ka lokal nga anciano sa usa ka lokal nga iglesia? Mao kana, oo, sir, may pagbulot-an ang lokal nga iglesia, ang matag iglesia sa kaugalingon niini. Bueno, ang pagkamanagsoon, maayo man kana. Ngani ang tanang iglesia angay man nga maanaa sa ingon niana nga pagkamanagsoon, nga magkauban gyud. Apan importante nga ang lokal nga iglesia aduna gyu'y iyahang pagbulot-an!

<sup>27</sup> Matikdi n'yo si Pablo, ingon nga usa ka bantugang batid nga magtutudlo, og binansay kaayo, kaniadtong paingon siya sa Damascus, usa ka adlaw, aron ipadakop ang mga tawo nga anaa niadtong bag-ong Dalanon. Bueno, sinsero baya siya. Pero dili man gud ka ginahukman sa Dios sumala sa imong pagkasinsero. Wala na gyud ko'y nakita nga mga tawong mas sinsero pa kay sa mga pagano. Daghan kanila nga patyon pa gani ang kaugalingon nilang mga anak, sa walay kapuslanan, ingon—ingon nga halad para sa usa ka dios-dios. Mao nga dili gyud ang pagkasinsero. Mahimo mang moinom ang usa ka tawo og carbohic acid, nga sinserong, gahunahuna nga ubang butang ang ginainom niya. Dili ang pagkasinsero ang nagaluwas kaninyo. "Adunay dalan nga daw matarung sa usa ka tawo, apan ang katapusan niini mao ang mga dalan sa kamatayon."

Sinsero man si Pablo kaniadtong misaksi siya, nga may pagbulot-an niya, aron batohon si Esteban. Pero pagkahuman sa pila ka mga tuig, nagustohan ko ang pagbasol ni Pablo, ingon siya, "Dili ako takus nga pagatawgon nga tinun-an o

pagatawgon nga apostoles, tungod kay gilutos ko ang Iglesia hangtud sa kamatayon.” Nga may pagkasinsero!

<sup>28</sup> Ug sa pagpaingon na niya didto, nagkaaduna siya og usa ka kasinatian. Mitungha ang Balaang Espiritu diha sa usa ka dakung Haligi nga Kalayo, ug gibutahan siya Niadto. Bueno, nahisgotan na nato kana, kadto nga Haliging Kalayo mao si Cristo. Ug Siya mao gihapon kadtong Haligi nga Kalayo nga nanguna kaniadto sa mga anak sa Israel latas sa kamingawan. Si Cristo mao ang Dios, ug ang Dios mao si Cristo. Nahimong unod ang Dios ug mipuyo sa lawas ni Ginoong Jesus. “Ang Dios diha kang Cristo, nga nagapasig-uli sa kalibutan ngadto sa Iyang Kaugalingon,” ginapakita kung unsa Siya.

<sup>29</sup> Dinhi sa Biblia, sa mga naunang bersekulo nga atong gibasa, nga, “Gihimo Niya ang Iyang Kaugalingon nga mas ubos kay sa mga Anghel. Gigamit ang porma, dili ang sa mga Anghel, kondili gigamit ang porma nga unod.” Wala man nahulog ang mga Anghel, mao nga wala sila nagkinahanglan og katubsanan. Ang unod ang nahulog, ang mga tawo, ug nagkinahanglan sila og katubsanan. Bueno, sa karaang mga kabalaoran, ang usa ka tawo, aron siya’y mahimong usa—usa ka manunubos, kinahanglan niya una nga mahimong kabanay; diha kini sa mahimayaong Basahon ni Ruth, nga nahisgotan na nato dinhi, usa ka higayon kaniadto. Ug kung unsa nga ang Dios, ingon nga Espiritu, nahimong kabanay nato, pinaagi sa pagkahimong usa sa ato, aron nga matubos kita ug hatagan kita og Kinabuhing Walay Katapusan. Kinahanglan Niya nga mamahimong kita, aron kita pinaagi sa grasya mamahimong sama Kaniya.

<sup>30</sup> Ug nahibaloan nato nga gipangunahan kaniadto sa Haligi nga Kalayo ang mga anak sa Israel. Ug kaniadtong nahimo Kining unod dinhi ibabaw sa yuta, nadungog nato Siya nga nagsulti usa ka adlaw, ug gipamahayag Niya nga Siya mao kadtong Haligi nga Kalayo. Miingon sila, “Ginaingon Mo ba nga labaw pa Ikaw kay sa among amahan nga si Abraham?”

<sup>31</sup> Ingon Siya, “Sa wala pa si Abraham, MAO NA AKO.” Si kinsa ba ang MAO NA AKO? Ang Haligi nga Kalayo didto sa nagadilaab nga sapinit, nga usa ka walay katapusan nga handumanan; sa matag henerasyon; dili lamang niadto nga henerasyon, kondili sa niini nga henerasyon usab, ang mao ra mismo nga Haliging Kalayo. Ug ngani mapasalamaton kita niining buntaga tungod aduna man kita’y retrato Niini, og nga wala gayud Siya nausab. Siya ang Imortal, Walay Katapusan, ang Maong Mapanalanginon. Ginabuhat Niya karon ang mao sa gihapong mga butang nga gibuhat Niya kaniadto, ug nagapabati gayud kini kanato nga malipayon!

<sup>32</sup> Apan adisir miuyon si Pablo niini nga kasinatian. . . Ingon nga nasayran nga ang Manulonda sa Ginoo mao ang Haligi nga Kalayo, nga mao si Cristo, ang. . . Bueno, Siya mao ang

Manulonda sa Pakigsaad, si Cristo. Mas maayo pa gani ang gihunahuna ni Moises, nga, mas gipalabi niyang antuson ang mga kasakit kauban ang katawohan ni Cristo, ug ang mapangunahan ni Cristo, kay sa tanang mga bahandi sa Egipto. Misunod siya kang Cristo, nga atua sa porma nga usa ka Haligiing Kalayo.

<sup>33</sup> Dayon miingon si Cristo, “Gikan Ako sa Dios,” kaniadtong ania pa Siya sa yuta, “Mobalik Ako ngadto sa Dios.” Human sa Iyang pagkamatay, paglubong, pagkabanhaw, og paghimaya sa lawas nga nagalingkod sa tuo sa Halangdon, aron sa pagpangaliya; nakita Siya ni Pablo ingon nga Haliging Kalayo, na usab: usa ka Kahayag nga nagpabuta sa iyang mga mata, halos; gibutahan gyud gani siya.

<sup>34</sup> Nakita pud Siya ni Pedro nga misulod sa bilanggoan ingon nga usa ka Kahayag, ug giablihan ang mga pultahan sa iyang atubangan samtang pagawas siya. Nahibaloan sàb nato nga Siya mao ang Alfa ug Omega, ang Sinugdan ug ang Katapusan.

<sup>35</sup> Ug ania Siya uban kanato, karon, nga ginabuhat ang mao ra mismong mga butang nga gibuhat Niya kaniadto, og ginapakita pag-usab ang Iyang Kaugalingon nganhi kanato, nagapakita ngadto sa kalibutan sa siyensiya.

<sup>36</sup> Oh, sa niining makuyaw nga takna sa kangitngit ug kaguliyang ibabaw sa yuta, kita gayud ang angay nga pinakamalipayon nga mga tawo sa tibuok kalibutan, nga managmaya, tungod nga nahibalo. Sa tanang panahon, nga ang mga tawo nadoktrinahan, sa tanan nang matang sa mga ismo ug mga ingon-anang butang dinhi sa yuta, ug bisan pa niana, sa karong panahon, ang tinuod, nga buhi nga Dios, pinaagi sa Iyang Pulong ug pinaagi sa Iyang makita nga kapanghimatuoran, ginapakita sa ato nga ania Siya uban kanato, nga nagapamuhat, nagapanglihok, buhi, og nagapamuhat nga eksaktong sama gayud sa Iyang ginabuhat sa una pa. Mao nga pagkamapribilihiyo gayud nato nga mga tawo, nga nakaangkon niini! Angay kitang. . . Ang Biblia miingon, dinha, sa ika-2 nga kapitulo, “Kinahanglan kuptan gayud nato kining mga butanga. Tungod kay, unsaon man nato sa paglikay, kung talikdan tà ang ingon ka dakung kaluwasan?”

<sup>37</sup> Bueno, nahibaloan nato, nga adisir miuyon si Pablo niadto nga kasinatian. . . Karon, ginasubli lang nato. Bueno, bisan unsa pa nga matang sa kasinatian ang inyong naangkon, iglesia, aduna ako’y ihangyo sa inyo. Bisan unsa pa kini ka maayong tan-awon, bisan unsa pa ka daw tinuod kini, gikinahanglan una nga masusi kini pinaagi sa Biblia. Kanunay gayud nga anaa sa Pulong! Ayaw gyud ninyo biyai Kana, tungod lang sa unsa man nga matang sa kasinatian.

<sup>38</sup> Ug si Pablo, adisir siya miuyon niini, miadto úna siya sa Arabia, ug nagpabilin didto sulod sa tulo ka tuig, para susihon



kini nga kasinatian pinaagi sa Pulong. Ug sa pagbalik niya, sigurado na gyud siya. Walay unsa man nga makapalibog kaniya, tungod kay lig-on na man siya sa Pulong, og dili na matarug. Ug mao nga dinhi kon diin siya mibalik aron ipakita niadtong mga Hebreohanon, ang mga mahimayaong butang nga gipropesiya, diha sa Daang Tugon, nga nangatuman kang Jesus Cristo. Pagkamahimayaon gayud!

<sup>39</sup> Bueno, niadtong miaging Domingo, o niadtong miaging Miyerkules, si Igsoong Neville dinhi, sa ika-5 nga kapitulo, nakahisgot siya og mga importante kaayo nga mga punto, tungod kay maanindot man gyud kini nga kapitulo. Ug nahibaloan nato nga naghisgot siya sa ika-4 nga kapitulo, niadtong miaging Domingo, mahitungod sa *Sabbath*, ang pagsaulog sa Sabbath. Sigurado ba kamo, niining buntaga, nga nasabtan na ninyo kung unsa ang pagsaulog sa Sabbath? Kung nasabtan na ninyo, moingon og, “Amen.” [Nagaingon ang kongregasyon, “Amen.”—Ed.]

<sup>40</sup> Ang *Sabbath* mao ang “Kaphulayan” nga atong pagasudlan, dili pinaagi’g adlaw, dili pinaagi’g balaod, kondili pinaagi sa pagsulod kang Cristo nga mao ang atong Sabbath. Siya man mao ang atong Sabbath. Gibalikan nato kini tanan diha sa Daang Tugon, ug gisaysay nga moabot ang panahon sa diha nga ang Pulong mahimong “lagda ibabaw sa lagda, sugo ibabaw sa sugo.” Ug gipamatud-an Niya nga misulod kita sa Iyang Kaphulayan niadtong Adlaw sa Pentecostes, “Kay siya nga ginakapoyan hatagan niini og pahulay, pahunongon.”

<sup>41</sup> Nahibaloan nato, nga, “Ang Dios nagtudlo og usa ka adlaw pinaagi kang David, mahitungod sa ikapitong adlaw.” Ug, “Ang Dios mipahulay sa ikapito.” Gihatag kini ngadto sa—sa mga anak sa Israel didto sa kamingawan. “Ug usab, nagtudlo Siya og usa ka adlaw.” Unsa man kadto nga adlaw? Usa ba ka adlaw sa semana? “Sa adlaw nga madungog ninyo ang Iyang Tingog, ayaw ninyo pagahia ang inyong kasingkasing.” Mao kana ang adlaw nga Iyang pagasudlan, aron hatagan kamo og usa ka Eternal nga pakigdait, usa ka Eternal nga Sabbath.

<sup>42</sup> Wala kamo nagaadto sa simbahan inig ka Domingo, aron mahimong relihiyoso, kung ingon-ana. Sa diha nga natawo na kamo sa Espiritu sa Dios, nagasulod na kamo sa maong Kaphulayan hangtud sa kahangturan, wala na’y pagsaulog-og-sabbath. Anaa na man kamo *sulod* sa Sabbath, sa kanunay, hangtud sa kahangturan, ug sa Eternidad. “Tapos na ang inyong mga kalibutanong buhat,” ang ingon sa Biblia, “ug nakasulod na kamo niining mapanalanginong pakigdait.”

<sup>43</sup> Ginapahimutang niining unang lima ka kapitulo si Jesus ingon nga Labaw’ng Sacerdote. “Ang Dios sa nagkalainlaing mga panahon ug nagkalainlaing mga paagi nagpakig-istorya sa atong mga ginikanan pinaagi sa mga propeta, apan sa niining

kaulahi-ang mga adlaw pinaagi na sa Iyang Anak, nga si Jesus,” unang kapitulo, unang bersekulo.

44 Dayon hangtud sa katapusan sa ika-5 nga kapitulo, makita nato Siya nga girepresentar ingon nga si Melquisedec, Nga walay sinugdanan sa mga adlaw, walay katapusan sa kinabuhi, apan sa kanunay usa ka Sacerdote hangtud sa kahangturan. Palandunga n’yo kini. Si kinsa ba kini nga halangdong Lalaki? Mahibal-an ra nato kini, diha sa mga duha pa ka kapitulo, ang tibook Niyang kinabuhi, pagatun-an nato: Kining halangdong Lalaki Nga misugat kang Abraham, Nga walay unsa mang papa, wala pu’y unsa mang mama, wala Siya’y unsa mang panahon kon kanus-a Siya nagsugod nga mabuhi, ni dili gyud Siya magkaaduna og panahon kon kanus-a matapos ang Iyang kinabuhi. Ug misugat Siya kang Abraham nga gikan kaniadto sa pagpamatay sa mga hari.

45 Matikdi n’yo kini nga halangdong Persona, kung Kinsa man Siya, buhi Siya sa gihapon. Wala Siya’y katapusan sa kinabuhi. Tungod si Cristo man kadto, ang iyang nahinagbo. Paingon na kita sa usa ka halawom nga pagtuon mahitungod niana, sa pipila ka mga adlaw.

46 Bueno, buut natong magsugod karon dinhi sa ika-5 nga kapitulo, ingon nga diyutay’ng paghulagway lang sa dili pa kita maghisgot sa—sa ika-6, tungod kay usa gayud kini ka mahimayaong butang. Matikdi n’yo og ayo. Magsugod kita sa may ika-7 na nga bersekulo sa niini nga kapitulo. Bueno, magsugod diay tà sa ika-6 nga bersekulo.

*Sumala sa giingon usab niya sa laing dapit, Ikaw sacerdote hangtud sa kahangturan sumala sa laray ni Melquisedec.*

*Nga sa iyang mga adlaw sa iyang unod, sa...nakahalad siya og mga pag-ampo ug mga pagpangamuyo uban ang makusog nga pagbakho... mga luha ngadto... kaniya nga may gahum sa pagluwas kaniya gikan sa kamatayon, ug siya gidungog tungod sa iyang diosnong kahadlok;*

*Nga bisan nga siya usa ka Anak, apan nakakat-on... sa pagkamasinugtanon pinaagi sa mga butang nga iyang giantus;*

47 Karon dinhi kon diin ko gustong maipasabot, kining ika-9 nga bersekulo. Paminaw mo. Sa hunahuna ko mora’g nahisgotan na kini ni Igsoong Neville, niadtong Miyerkules. Nga wala ako dinhi. Bueno, paminawa n’yo.

*Ug sa nahimo siyang hingpit, alang kanila nga nagatuman kaniya nahimo siyang magbubuhat sa kaluwasan nga walay katapusan;*

*Nga ginganlan siya sa Dios labaw'ng sacerdote sumala sa laray ni Melquisedec.*

*Tungod kaniya kami adunay daghang mga butang nga ikasulti, . . .*

48 Biyaan sà nato kini dinha, tungod kay higsotan man nato si Melquisedec sa pipila ka mga gabii.

49 Karon sugdan na nato kining, atong regular nga pagtuon. Gusto ko unta. . . Basahon ko lang úsa ang uban pa nga bahin niini sa makadiyut, sa ika-11 nga bersekulo.

*Tungod kaniya kami adunay daghang mga butang nga ikasulti, . . . nga malisud sabton, sa hingkaplagan namo nga kamo nabungol sa pagpanimati.*

*Kay sa diha . . . nga tungod sa panahon kinahanglan kamo mahimong mga magtutudlo, kamo nagkinahanglan na usab nga may usa nga magatudlo kaninyo sa mga sinugdan sa nahaunang mga pagtulonan sa mga pulong sa Dios; ug nangahimo nga ingon sa mga nagkinahanglan sa gatas, imbis sa kalan-on nga magahi.*

*Kay ang tagsatagsa nga nakig-ambit sa gatas walay kasinatian sa pulong sa pagkamatarung: kay bata pa man siya.*

Oh, nagalaum ako nga ipatuhop gyud kini sa Balaang Espiritu dinha sa kinahiladman ninyo karon.

*Kay siya nga—nga nakig-ambit sa gatas walay kasinatian sa pulong sa pagkamatarung: kay siya usa pa man ka bata.*

50 Kon imong hatagan ang usa ka masuso og gahi nga pagkaon, mapatay mo lang kini. Mao gani kana'y hinungdan nga daghan kaayong mga tawo ang nagaingon, “Ah, ako—wala ako nagatoo niana,” ug molakaw ra palayo. Mga bata sa gihapon! Mao nga dili gayud sila makasabot. Dili nila masabtan kana nga Kamatuoran. Mapatay ra sila Niini—Niini. Daghan, kaayong mga butang nga kinahanglan unta nga masayran sa iglesia karon, apan dili mo Kini maitudlo. Sila—sila—sila—sila—nagakapangdol sila Niini. Wala sila masayod kung unsay buhaton nila Niini.

51 Si Pablo, nga nagapamulong ngadto niini nga grupo sa mga Hebreohanon. . . Gani, sa mga eskolar pa gyud siya namulong kaniadto, mga eskolar, nga mga maalamon gayud. Masayran nato kana, sa pipila—sa pipila ka gutlo, nga manggialamon kaayo. Apan sa halawom og espirituwal nga Misteryo, buta gihapon Niini ang iglesia. Ang ingon niya, “Sa diha nga kamo nanudlo na unta sa uban, pero mga bata pa man gihapon kamo.”

52 Oh, nasayod ko nga daghan ang managpanungha ug manggawas ug moingon, “Oh, dili ko na kinahanglan nga

moadto pa sa simbahan. Dalaygon ang Dios, miabot na ang Espiritu Santo, Siya mismo ang magtutudlo.” Kon ingon-ana ang inyong panghunahuna, nan sayup gyud kamo. Kay nganong nagpahimutang pa man ang Espiritu Santo og mga magtutudlo sa Iglesia kung Siya mismo ang mamahimong Magtutudlo? Kita n’yo? Mao gani nga adunay mga apostoles, mga propeta, mga magtutudlo, mga ebanghelista, ug mga pastor. Nagpahimutang ang Balaang Espiritu og mga magtutudlo sa Iglesia, aron nga makatudlo Siya pinaagi sa maong magtutudlo. Ug kung dili kana—kana sumala sa Pulong, nga dili kana ginapanghimatud-an sa Dios, nan dili kana husto nga matang sa pagtudlo. Kinahanglan nga nagakatakdo kana sa tibuok Biblia, ug mahimong ingon ka buhi karon sa kung unsa Kini kaniadto. Kana ang tinuod gyud nga butang nga napadayag.

<sup>53</sup> Karon matikdi n’yo.

*Apan ang kalan-on nga magahi alang sa mga tauwong. . .hamtong, niadto gayud nga tungod sa mga pagbansay naanad. . .naanad ang ilang mga salabutan sa pag-ila sa maayo ug sa dautan.*

Hibaloon gyud kung unsa ang husto ug kung unsa ang sayup, pinaagi sa pagpang-ila.

<sup>54</sup> Karon matikdi n’yo, magsugod na tà karon sa atong leksyon. Sa niining maanindot nga basihanan karon, basahon tà ang unang bersekulo.

*Busa biyaan tà na ang nahaunang mga tuloohan mahitungod kang Cristo, . . .*

Unsa ma’y ginaingon niya? Gisaysay kining unang lima ka kapitulo mahitungod kang Cristo, aron ipakita kung Kinsa Siya. Sa karon ginabiyaan na nato ang nahaunang mga tuloohan mahitungod kang Cristo.

<sup>55</sup> Unsa ma’y atong nahibaloan mahitungod sa kung unsa Siya? Hingsayran nato nga Siya mao ang Gamhanang Jehovah nga Dios nga nadayag diha sa unod. Hingsayran nato nga—nga Siya dili usa ka propeta, kondili ang bug-os mismong kahupnganan sa Pagka-Dios. Siya mao si Jehovah nga nahimong unod. Ug ang lawas, si Jesus, Iya lamang gipuy-an. Ang Dios nga nagapuyo sa tawo. Ang Dios nga nagapasig-uli ngadto sa tawo, pinaagi sa tawo, pinaagi sa ulay nga pagkahimugso sa Iyang Kaugalingong Anak. Ug si Jehovah, nga Espiritu, mipuyo Kaniya.

<sup>56</sup> Karon, pila man ang nakahinumdom sa pagtudlo mahitungod sa pagka-Dios, nga atong gibalikan ug nasayran nga ang Dios susama sa dakung balangaw nga adunay nagkalainlaing Espiritu, og kung unsa Kadto? Ug dayon migula ang Logos gikan sa Dios, nga nahimong theophany, ug anaa kadto sa porma sa usa ka tawo. Ug nakita ni Moises Kadto nga milabay, didto sa liki sa bato. Ug pagkahuman ang maong theophany bug-os gayud nga nahimong unod, nga mao si Cristo.

Ug kung unsa nga nasayran pud nato nga kita, pinaagi sa Iyang grasya, adunay Kinabuhing Walay Katapusan. Bueno, ang pulong nga *hangtud sa kahangturan* mao'y "para sa usa ka gintang; para sa usa ka gidugayon sa panahon." Ang gikaingon, sa Biblia, "Hangtud sa kahangturan *ug* hangtud sa kahangturan," usa ka pang-sumpay. Bueno ang hangtud sa kahangturan nagakahulogan lamang og "usa ka panahon." Apan ang Walay Katapusan nagakahulogan og hangtud sa kahangturan. Ug ang tanan nga adunay sinugdanan adunay katapusan, pero ang mga butang nga walay sinugdanan wala pu'y katapusan. Busa walay sinugdanan ang Dios ug wala pud Siya'y katapusan.

<sup>57</sup> Ug, busa, si Melquisedec, ang halangdong Sacerdote, nga sama sa usa ka tawo, wala Siya'y sinugdanan ug wala Siya'y katapusan. Ug mao nga kita, pinaagi niadtong theophany, diin, gilalang kita diha sa dagway sa Dios sa wala pa gibuhang kalibutan; sa dihang nahimong unod kadtong theophany ug mipuyo ipon kanato, kaniadto, pinaagi sa Iyang kamatayon, gidawat nato mismo ang Iyang Espiritu ug wala na kita'y katapusan; duna na'y Kinabuhing Walay Katapusan; dili ingon nga mga Anghel, kondili mga lalaki ug mga babaye mismo. Oh, ako . . . Sa unsa mang paagi, kung maipahayag ko lang unta kini sa paagi nga masabtan gyud kini sa akong—akong mga tigpaminaw! Dili gyud kamo mamahimong Anghel. Nagbuhat man ang Dios og mga Anghel, ug nagbuhat pud ang Dios og tawo. Ug ang ginabuhat sa Dios gikan mismo sa Dios, nga ingon ka Walay Katapusan sama sa Dios. Ug ang tawo ingon gayud ka Walay Katapusan usab sama sa Iyang Magbubuhang, tungod kay gibuhang man siya gikan sa Eternidad.

<sup>58</sup> Apan adunay katapusan ang sala, adunay katapusan ang pag-antus. Busa, dili mahimong magkaaduna og Eternal nga impiyerno. Hinoon aduna ma'y impiyerno, kalayo ug asupre, nasayod kita niana, pero wala gayu'y Eternal nga impiyerno. Ingon nga aduna lamang og usa ka matang sa Kinabuhing Eternal ug kana'y iya sa Dios lamang. Kung mag-antus kamo hangtud sa kahangturan, nan aduna diay kamo og Kinabuhing Eternal. Adunay katapusan ang impiyerno, tingali'g binilyon pa ka mga tuig, apan sa kaulahian modangat gyud kana sa katapusan.

<sup>59</sup> Ang Biblia wala man nagaingon, sa bisan asa, nga Eternal silang nag-antus, ang giingon, "Hangtud sa kahangturan ug hangtud sa kahangturan." Ngani nagdahum si Jonas nga atua siya sa sulod sa tiyan sa balyena "hangtud sa kahangturan," usab. Ang *hangtud sa kahangturan* aduna ma'y gintang o usa ka tagal sa panahon. Apan ang *Eternal* wala gayu'y katapusan, wala kini'y sinugdanan o katapusan man. Mora kini og usa ka singsing, usa ka lingin. Ug samtang nagairog ang atong panahon, nagatuyok lamang kita sa mga mahimayaong katuyoan sa Dios.

<sup>60</sup> Ang katuyoan sa Dios mao ang buhaton ang tawo diha sa Iyang dagway, aron Iyang maka-fellowship. Ug mao nga Iyang gibuhat siya ingon nga usa ka mahikap nga linalang. Bueno, ang sala lang ang nagdala kanato sa usa ka dapit sa—sa—sa pagkadunot, apan wala gyud kadto nakapahunong sa programa sa Dios. Ug, higalang makasasala, karon, kung wala ka pa matawo pag-usab sa Espiritu sa Dios, nan aduna ka gayu'y katapusan sa kon asa man. Ug ang imong katapusan mao ang kaguliyang, pagkapukan, ug pag-antus ug kaalautan. Apan kaninyo nga mga nanagtoo kang Ginoong Jesus, ug gidawat Siya ingon nga inyong personal nga Manluluwas, ingon gayud kamo ka Walay Katapusan usab maingon nga ang Dios Walay Katapusan. Wala kamo'y katapusan, “Hatagan Ko sila og Walay Katapusan nga *Zoe*, Kinabuhi Mismo sa Dios, ug dili gayud sila mangalaglag ni Pagahukman sa silot, kondili miagi na gikan sa kamatayon ngadto sa Kinabuhi.” Ingon niana Siya. Mao kana ang Iyang gianhi.

<sup>61</sup> Bueno, si Jesus, sa Iyang pag-anhi, sa Iyang pagka-sacerdote, wala gayud mianhi aron lang kaloy-an. Daghang mga tawo man gud ang nagatudlo og ingon-ana, nga mianhi kono Siya, nga nagaingon, “Bueno, tingali kung mag-antus Ako, mamahimo Akong usa—usa—usa ka makaluluoy'ng tan-awon ug sigurado gayud nga moduol Kanako ang mga tawo.” Sayup kana. Wala ma'y Kasulatan para niana.

Tungod kay, ang matag tawo nga mamaluwas, naila na man sila sa Dios sa wala pa maporma ang kalibutan. Mao kana'y ginaingon sa Biblia. Ang Dios wala gyud magtinguha, karon, nga adunay mahanaw. Kondili ginatinguha Niya nga silang tanan makadangat unta sa paghinulsol. Apan, ingon nga Dios, pinaagi sa pagkahibalo-nang-daan hingsayran na Niya kini.

<sup>62</sup> Tan-awa n'yo sa Mga Taga-Roma, ika-8 nga kapitulo. Nagasaysay si Pablo kaniadto, nagasulti mahitungod sa pagpili sa Dios, nga, “Sila ni Esau ug Jacob, sa wala pa matawo bisan ang usa sa niining duha ka bata, o ingon niana, miingon ang Dios nga naila na Niya sila ug gidumtan Niya si Esau ug gihigugma si Jacob,” sa wala pa man magkaaduna—magkaaduna og kahigayonan ang usa sa ilang duha nga ipahayag ang ilang pagpasalamat, tungod kay Dios man Siya. Nasayod Siya . . . Siya walay-kinutoban. Kung Siya walay-kinutoban, nan hingsayran na Niya ang matag pulgas, matag langaw, matag tagnok, og tanan-tanan nga maanaa sa yuta, hingsayran na Niya kana. Siya man mao ang walay-kinutoban, Eternal, imortal, mapanalanginon nga Dios, makagagahum-sa-tanan, anaa-sa-tanang-dapit, og nahibalo-sa-tanan. Walay unsa mang butang nga wala Niya nahibaloan. Mao kana'y hinungdan nga masulti Niya kung unsa ang mamahimong katapusan. Hingsayran na Niya ang katapusan gikan sa sinugdan.

<sup>63</sup> Kung ma-propesiya man kini tungod sa Iyang kahibalo. Siya mao ang pangulong abogado. Siya—Siya mao—Siya mao ang Maghuhukom. Ug Iya lamang ginasulti sa—sa abogado ang pipila sa Iyang kaalam. Ug ingon niana ang propesiya, nga makapanagna, tungod kay nasayod man Siya kung unsa ang mamahitabo. Karon, ingon-ana ang Dios nga atong ginaalagaran. Dili nga dios sa kasaysayan, dili sama sa mga Buddhist ug sa mga Mohammedan, ug uban pa. Kondili, usa gyud ka Dios nga anaa-sa-tanang-dapit, nga ania mismo karon, niining buntaga, dinhi niining tabernakulo karon mismo; ang Gamhanang Jehovah, ang MAO NA AKO, Nga nagporma sa Iyang Kaugalingon diha sa pagkamapainubsanon, aron gamiton ang porma sa makasasala nga unod. Ania Siya. Nga Mao’y nagtubos kaninyo. Wala na’y uban pa, sa kon asa man, sa unsa mang panahon ang makabuhat niini.

<sup>64</sup> Tungod wala man ang Dios og tulo ka persona didto sa ibabaw, nga gipadala ra ang usa kanila, nga Iyang Anak. Kondili ang Dios kadto, Mismo, nga mianhi sa porma sa Anak. Ang anak adunay sinugdanan, ug ang maong Anak aduna pu’y sinugdanan. Nga, ang pipila kaninyo nga mga minahal nga Katoliko, aduna gani ko’y libro ninyo nga, *Facts Of Our Faith*, nga miingon, “Ang Eternal nga pagka-anak sa Dios.” Unsaon man ninyo sa pagpahayag nianang pulonga? Unsaon man ninyo sa pagpangatarungan niana? Unsaon man pagkahimo niana nga Eternal? Dili gyud kana basi sa Biblia. Sa inyong libro ra kana, “ang Eternal nga pagka-anak.” Wala sila. . . Dili kana husto nga pulong. Kay, ang tanang anak aduna ma’y sinugdanan, ug walay sinugdanan ang Eternal, busa wala gayu’y Eternal nga pagka-anak. Nahimong unod kaniadto si Cristo ug mipuyo ipon kanato. Mao nga aduna Siya’y sinugdanan. Pero dili ingon nga Eternal nga pagka-anak. Kondili Eternal nga pagka-Dios, dili pagka-anak. Bueno, mianhi Siya aron tuboson kita, ug Iya gyud kitang gitubos.

<sup>65</sup> Karon, si Pablo, sa gihisgotan niya dinha, sigurado ko nga sa nangaging mga leksyon nasabtan na ninyo kini. Pero ato pa kining sublion pag-usab, sa laing higayon, kon itugot sa Ginoo, bersekulo sa bersekulo gayud. Karon.

*Busa ingon nga . . . biyaan tà na ang—ang nahaunang mga tulooan mahitungod kang Cristo, managpadayon kita ngadto sa kahingpitan; . . .*

<sup>66</sup> Nakapandol kana kanila, dili ba? Buhaton nato ang unsa?

*. . . managpadayon kita ngadto sa kahingpitan; sa dili na pagpahimutang pag-usab sa mga sukaranan. . .*

<sup>67</sup> Matikdi n’yo kini. Hisgotan sà nato kining pulong nga “kahingpitan.” Nasayod ba mo nga adunay usa lamang ka paagi para makabarug kamo sa Presensiya sa Dios? Kana mao ang,

pagkahimong hingpit. Dili man mahimo sa Dios nga mouyon-uyon sa mga dautang butang.

<sup>68</sup> Ug kamong mga legalista: unsaon man ninyo sa paghingpit ang inyong kaugalingon, nga wala gani kamo'y ni usa ka butang aron mahingpit ang inyong kaugalingon? Ingon nga natawo kamo sa sala. Ang mismong pagsamkon kaninyo tungod man sa sala. Ang mismong tinguha nga nagpatungha kaninyo dinhi sala man usab. "Natawo sa sala, giumol diha sa kadautan, mianhi sa kalibutan nga nagapanulti'g bakak." Karon asa kaha kamo mobarug?

<sup>69</sup> Asa kaha kamong, makasasala, nga—nga nagaingon, "Undangan ko na ang pagpanigarilyo. Mahiadto ako sa Langit"? Asa kaha kamong mga, dagaang, yabag, nagpatawag ra nga Cristohanon, nga nagatambong-tambong dinhi nga mug-ot ang nawong ug nagaingon, nga, "Bueno, miyembro man ako sa iglesia"? Kamong makasasala. Husto. Gawas kon matawo kamo sa Espiritu sa Dios, malaglag gyud kamo. Tinuod kana.

<sup>70</sup> Unsaon man ninyo pagpakaadto sa Langit? Moingon mo, "Wala gyud ko namakak sa tibuok kong kinabuhi." "Oh, pinalangga. Usa—usa na ako ka Anghel, sa sugod pa lang." Bakak kana. Dili ko igsapayan kung unsa ka pa ka maayo; makasasala gihapon ka. Ug wala gyud ka'y bisan unsa; walay pari, walay obispo, walay kardinal, walay papa, wala'y bisan unsa pa man nga makaluwas kaninyo, tungod kay anaa man sàb siya sa mao ra nga sakayan nga imong nahimutangan. Hisgotan nato kana sa pipila ka gutlo. Anaa sa mao ra mismo nga kahimtang. Siya'y . . . ang papa sa Roma natawo man sàb sa sala, giumol diha sa kadautan, mianhi sa kalibutan nga nagapanulti'g bakak, og natawo pinaagi'g pangibog sa pakighilawas tali sa usa ka lalaki ug usa ka babaye. Unsaon man ninyo pagkahimong matarung sa ingon niana?

<sup>71</sup> "Bueno, natawo man sàb ang iyang papa ug mama sa mao rang paagi, ug natawo gyud sila tungod sa mao rang paagi, ug bisan ang iyang lola ug lolo ug sa mga nauna pa niini." Sala na, sa sugod pa lang!

<sup>72</sup> Busa si kinsa man ang makasulti nga *kini* balaan ug *kana* balaan? Aduna lamang og usa ka balaan, kana'y si Jesus Cristo, ang Anak sa buhi nga Dios, Nga gihimong hingpit. Ug ang gikinahanglan sa ato mao ang mamahimong hingpit. Karon, unsaon man nato pagkahimong ingon niana? Sulayan n'yo kana, sa kinaugalingon n'yo. Dili ko gayud gustong sulayan nga makaadto sa Langit tungod lang sa, "Natawo ako singko minutos pa lang ang milabay, ug ginabiyaan ko na ang kalibutan karon." Malaglag gihapon ako. Bisan pa kung wala ako sukad nagkaaduna og dautan nga hunahuna sa tibuok kong kinabuhi, bisan pa kung wala ako sukad nakasulti og dautan nga pulong sa tibuok kong kinabuhi, bisan pa kung wala ako sukad



nakatan-aw og unsa man nga dautan, bisan wala ako sukad nakahunahuna og unsa man nga dautan, o unsa pa man, sa gihapon ako'y ingon gayud ka mabaho ug maitum nga sama sa mahugaw nga dingding sa impiyerno. Tungod usa man ako ka makasasala.

<sup>73</sup> Mahimo kong ikinabuhi ang tibuok kong kinabuhi ug magpabilin lang nga nakatago sulod sa usa ka lawak, nga susama sa pipila ka Carmelite nga mga madre o mora'g ingon niana, ug dili gayud makita ang kalibutan, magpabilin lang sa sulod ug mag-ampo sa tibuok kong kinabuhi, magbuhat og maayo, matawo ingon nga usa ka multimilyonaryo ug ipanghatag sa mga kabus ang tanan-tanan nga aduna ako, ug makasasala gihapon ako ug ma-impiyerno gayud. Oo, sir.

<sup>74</sup> Mahimo man akong magpamiyembro sa iglesiang Lutheran, Baptist, Pentecostal, Presbyterian, sukad pa sa pagkabata, ug magkinabuhi nga maunongon sa niana nga iglesia hangtud magedad og usa ka gatus ka tuig, ug kuhaon na ang akong kinabuhi, ug walay tawong makapunting sa ilang tudlo nganhi kanako ug moingon pa gani og, "Wala gyud siya sukad nagkaaduna og bisan usa ka dautan nga hunahuna," ma-impiyerno gihapon ako sa ingon ka sigurado nga nagatindog ako.

<sup>75</sup> Usa ako ka makasasala. Husto kana. Wala gyud ko'y bisan unsa man. Wala'y paagi, man lang, nga makakaplag ako og unsa—unsa man para mabayran ang bili. Kamatayon man ang gikinahanglan sa Dios. Ug kung itugyan ko ang kaugalingon kong kinabuhi, kung itugyan ko ang akong kinabuhi, nan unsaon man nako sa paghinulsol? Tungod, kamo. . . Ingon nga ang utang kinahanglan nga mabayran, una. Ug ang Dios lang man ang Bugtong makatugyan sa Iyang kinabuhi ug bangonon Kini pag-usab. Aron mamahimo Siya nga sala, ug itugyan ang Iyang Kinabuhi ug bangonon Kini, ug tawgon kana nga "pagkamatarung," ug mabayran na ang utang. Mao kana.

<sup>76</sup> Karon moabli kita sa Mateo, sa ika-8 nga kapitulo, nagatoo ko nga mao kana, ika-7 o ika-8 nga kapitulo. Atong tan-awon kung unsay ginaingon ni Jesus dinhi. Sige. Sa Mateo, sa ika-5 nga kapitulo diay. Ug sa . . . si Jesus, nagwali, ginawali ang mga kabulahanan, sa ika-47 nga bersekulo.

*Ug kung kamo magpangumosta sa inyong mga igsoon lamang, unsa ang ginabuhat ninyo nga labaw kay sa ginabuhat sa uban? wala ba magabuhat ang mga Gentil . . . ? (Matikdi n'yo.)*

*Apan magmahingpit kamo, . . . (Unsa?)*

*Busa magmahingpit kamo, ingon nga hingpit ang inyong Amahan nga langitnon.*

Mao kana ang sugo ni Jesus, "Magmahimo kamong ingon niana."

77 Moingon sila, “Wala ma’y si bisan kinsa ang mamahimong hingpit, ang Biblia miingon, ‘Walay si kinsa man nga hingpit.’ Dinha ang inyong panagsumpaki.” Dili ba? Sige.

78 Dili man kamo mamahimong hingpit pinaagi sa kaugalingon n’yo mismo. Kung nagasalig kamo sa inyong mga nabuhat, malaglag gyud kamo. “Busa magmahingpit kamo, ingon gayud ka hingpit nga sama sa Dios nga hingpit.” Ania:

*Busa magmahingpit kamo, ingon nga hingpit ang inyong Amahan . . . nga langitnon.*

79 “Busa . . .” Karon sa ika-5 nga kapitulo, ika-6 nga kapitulo sa Mga Hebreohanon.

*Busa biyaan tà na ang nahaunang mga tuloohan mahitungod kang Cristo, managpadayon kita ngadto sa kahingpitan; . . .*

80 Karon, kamo, Branham Tabernacle. Oh, kabalo ko, “Aduna kami’y mga pagpang-ayo.” Maayo man kana. “Aduna kami’y mga panan-awon.” Oh, kana—maayo man kana. Ug aduna kamo’y espirituhanong mga damgo, ug usahay dili kana espirituhanong mga damgo. Ug—ug usahay kamo . . . “Kami, nagatabang kami sa mga kabus. Ginabuhat namo kung unsa’y among mahimo.” Oh, maayo man kana, pero dili kana ang atong ginahisgotan karon. Nagasulod na kita sa usa na usab ka hugna.

*. . . biyaan . . . ang tuloohan . . .*

81 “Oh, oo, nabatonan namo ang doktrina mahitungod kang Cristo. Nagatoo kami nga Siya mao ang Anak sa Dios, nga gipanganak sa ulay. Nagatoo kami niana, lakip ang tanan niining mga butanga.” Maayo gayud kana.

82 Apan, “Biyaan na nato kana, managpadayon kita ngadto sa kahingpitan.” Oh, grabe! Aduna lang unta ako’y tingog sa usa ka arkanghel karon, aron maipahayag kini sa punto nga mahimo n’yo kining masabtan. Ania nagaingon siya, “Biyaan tà na ang tanang tuloohan mahitungod kang Cristo,” ang tanang mga—mga teologo, ug ang tanang teolohiya nga nahibaloan nato, og ang tanang mahitungod sa pagka-Dios ni Cristo, kung unsa nga Siya mao ang Dios nga nahimong unod, og tanan na niining uban pang mga butang.

83 Nagpadayon si Pablo sa pagsaysay niining tanan dinhi, sa pipila ka gutlo. Basahon sà nato kini, sa makadiyut lang, adisir nato hisgotan kini.

*. . . sa dili na pagpahimutang pag-usab sa mga sukaranan sa paghinulsol gikan sa patay nga mga buhat . . .*

Bueno, nagatoo kita niana.

*. . . ug pagtoo ngadto sa Dios,*

Nagatoo pud kita niana.

Ug sa *pagtulon-an mahitungod sa mga bautismo*, . . .

Sa kung unsang paagi kamo angay'ng mabautismohan, nagatoo kita niana.

. . . *ug sa pagpandong sa mga kamot*, . . .

Nagatoo kita sa pagpandong og mga kamot, dili ba? Kita n'yo, sa tanan niana, oo.

. . . *ug sa pagkabanhaw sa mga patay*, . . .

<sup>84</sup> Nagatoo kita niana. Karon matikdi n'yo. Makita n'yo dinhi, “ang Paghukom,” gigamit ingon nga, “Walay Katapusan.” Kana'y hangtud sa kahangturan. Pag gisulti na sa Dios ang paghukom, hangtud sa kahangturan na kana. Kung ingon-ana, wala na'y pagpasig-uli human nga gipahayag na ang paghukom. Karon masabtan na ninyo kung nganong gikinahanglan sa Dios nga angkonon ang Iya Mismong—Iya Mismong, sama sa tawag nato niini, ang Iya Mismong panambal. Kaniadtong gihukman Niya ang tawo tungod sa pagpakasala, ang bugtong paagi aron Iya kining mapasig-uli, mao nga pulihan Niya Mismo ang tawo. Mao lang kadto ang bugtong paagi nga mapasig-uli ang tawo, o mapasig-uli kita, mao ang pulihan Niya kita ug mahimo Siyang makasasala. Ang Dios, si Jehovah, nahimong usa ka makasasala, ug gitugyan Niya ang Iyang kinabuhi.

<sup>85</sup> Karon, mahimo mong itugyan ang imong kinabuhi, ingon nga usa ka makasasala, aron mamatay tungod sa maong katuyoan. Ang ingon ni Pablo, “Bisan itahan ko pa ang akong lawas aron pagasunogon ingon nga usa ka halad, wala gihapon ako'y kapuslanan,” tungod kay dili gyud kana magsilbi. Kita n'yo, pag mamatay kamo, wala na kamo. Kon mamatay kamo ingon nga usa ka makasasala, malaglag gyud kamo.

<sup>86</sup> “Apan mikanaug ang Dios diha sa unod, ug gihukman ang sala diha sa unod, sa pagkahimo Niyang makasasala nga unod.” Tungod kay, Siya man ang Eternal nga Dios, ug gibanhaw ang Kaugalingon Niyang lawas, mao nga Siya mismo ang Tigpamatarung.

<sup>87</sup> Bueno, kining tanang mga butanga, “Managpadayon kita ngadto sa kahingpitan,” ang ingon ni Pablo. Karon unsa na man?

. . . *sa paghukom nga walay katapusan*.

. . . *kini atong pagabuhaton . . . igatugot sa Dios*. (ika-3 nga bersekulo.)

<sup>88</sup> Karon, “Managpadayon ta ngadto sa kahingpitan.” Miingon si Jesus, “Busa magmahingpit kamo, ingon nga hingpit ang inyong Amahan nga atua sa Langit.”

Ug kita, ang matag usa sa ato, nahinukman na man. Bisan unsa pa ang buhaton nato, nahinukman na kita. Natawo kita, nga nahinukman na. Natawo ang imong mama ug papa, nga nahinukman na. Ang inyong, ang tanan ninyong mga

katigulangan natawo pud sa sala, giuol diha sa kadautan. Busa unsaon man ninyo pagpakaangkon niana? Unsaon man ninyo pagkahimong hingpit? Bisan pa kung wala kamo'y nabuhat nga bisan unsa, wala nakapangawat, wala nakapamakak, og wala gyud nakabuhat og bisan unsa sa tibuok n'yong kinabuhi, sa gihapon nahinukman na kamo. Nahinukman na kamo bisan sa wala pa kamo miginhawa sa una n'yong gininhawa. Nahinukman na kamo. Husto kana. Ug gihukman na kamo sa Dios bisan sa wala pa kamo miginhawa sa una n'yong gininhawa. Kay nahukman man kamo, tungod sa pangibog sa pakighilawas sa inyong amahan ug inahan nga, pinaagi sa ilang gibuhay, nahimugso kamo dinhi sa kalibutan. Ug gihukman kadto sa Dios, sa sinugdan pa kaniadto. Nahinukman na gyud kamo, sa sugod pa lang. Busa asa man ninyo. . . Ug ang matag tawo sa kalibutan nahinukman man usab uban kaninyo. Busa asa man ninyo maangkon ang kahingpitan?

<sup>89</sup> Matikdi n'yo. Moabli sa kita sa makadiyut sa Mga Hebreohanon, sa ika-10 nga kapitulo. Paminaw mo og ayo. Buot ko nga mobasa og diyutay dinha sa ika-9 nga kapitulo, una, sa ika-11 nga bersekulo.

*Apan si Cristo nga miabot nga usa ka labaw'ng sacerdote sa mga maayong butang nga palaabuton, pinaagi sa labing daku ug labing hingpit nga tabernakulo, ang Kaugalingon Niyang tabernakulo, ang Iyang unod, . . .*

<sup>90</sup> Kita n'yo, ang karaang tabernakulo. . . Namatikdan ba ninyo? Ang karaang tabernakulo aduna kadto'y tabil, nga nagtago sa arka kon diin nagapuyo ang Dios. Pila man ang nasayod niana? Oo. Bueno, kadtong karaang tabernakulo nga hinimo'g-tawo, ang mga tabil niadto gikan sa gitina nga mga panit sa kanding, ug uban pa, gihimo kadtong usa ka tabernakulo aron itago ang Presensiya sa Dios. Pila man ang nasayod nga usa lamang ka tawo ang puedeng makasulod didto kausa sa usa ka tuig? Tinuod gayud. Si Aaron lang kadtong, makasulod kausa sa usa ka tuig. Ug kinahanglan nga dinihogan siya. Ug—ug, oh, mao kadto ang gikinahanglan! Ug kinahanglan sa'ng nga adunay kalayo diha sa iyang kamot; ug kung mosulod siya nga wala kadto, nan mamatay siya sa dihadhiha nga iwahing niya kadtong tabil. Magbuy-od siya nga patay na. Kinahanglan niyang mosulod didto ug pasigaon kadtong mga tangkawan, ug wisik-wisikan ang lingkoranan sa kalooy nga nagatawag, og dugo sa kamatayon, nga mao'y pangpuli, hangtud nga moabot si Cristo aron tumanon kini.

<sup>91</sup> Bueno, apan, pagkahuman niadto misulod ang Dios sa usa na usab ka matang sa tabernakulo. Ug Kinsa man kadto nga tabernakulo? Si Jesus. Ug ang Dios anaa sa sulod ni Jesus, ug natago Siya, apan ginapasig-uli Niya ang kalibutan ngadto sa Iyang kaugalingon, pinaagi sa Iyang mga pagpadayag.

Gipadayag ni Cristo ang Dios. Miingon Siya, “Dili Ako ang nagabuhat sa mga buhat. ang Akong Amahan kini nga nagapuyo Kanako. Wala Ako’y bisan unsa nga ginabuhat sa Akong Kaugalingon gawas lamang sa Akong makita nga ginabuhat sa Amahan. Ang Amahan nga anaa Kanako, ginapakita sa Ako kini nga mga panan-awon, ug dayon buhaton Ko na kung unsa lamang ang gikasulti sa Amahan nga Akong pagabuhaton.” Nasabtan n’yo ba? Ang Dios anaa sa sulod sa lawas sa tawo, dili sa luyo sa gitina nga mga panit sa kanding, kondili anaa sa buhi, og nagalihok. Ngani ang Dios aduna ma’y mga kamot; ang Dios adunay mga tiil; ang Dios adunay dila; ang Dios adunay mga mata; ug kadto mao si Cristo. Mao kadto Siya.

<sup>92</sup> Bueno, mibiya Siya, ug mianhi ang Espiritu tungod niana, aron nga pinaagi sa Iyang kamatayon mamahingpit Niya ang Iglesia ug himoong masinugtanon ang Iglesia. Ug kung ingon-ana ang mao ra nga Espiritu nga atua kang Cristo anaa usab sa Iglesia, nga ginabuhat ang mao ra mismong mga butang nga gibuhat ni Cristo. “Sa diriyut lamang panahon ug ang kalibutan dili na makakita Kanako; apan kamo makakita Kanako, kay Ako magauban kaninyo, bisan sa sulod ninyo, hangtud sa katapusan sa kalibutan.”

<sup>93</sup> Karon paminawa n’yo kini.

*Apan si Cristo nga nahimong usa ka labaw’ng sacerdote sa mga maayong butang nga palaabuton, pinaagi sa labing daku ug labing hingpit nga tabernakulo, nga dili binuhat sa mga kamot, sa ato pa, dili niining pagkabuhata;*

Dili Siya hinimo og mga kamot. Sa unsa mang paagi Siya natawo? Sa ulay nga pagkahimugso.

*Dili usab pinaagi sa dugo sa mga kanding ug mga nating baka, kining lawasa gihalad o gipabalaan, kondili pinaagi sa iyang kaugalingong dugo. . .*

<sup>94</sup> Kabalo na man mo nga ang dugo nagagikan sa amahan. Ug dayon adunay miingon, “Oh, si Jesus usa man ka Judio.” Dili Siya usa ka Judio. “Oh, naluwas kita pinaagi sa dugo sa Judio.” Dili, dili gayud. Kay kung naluwas man kita pinaagi sa dugo sa Judio, nan malaglag gihapon kita.

Dili man Judio si Jesus, dili usab Siya Gentil. Siya mao ang Dios: Dios nga Amahan, ang Espiritu, ang Maong dili-makita. “Wala pa gayu’y tawo nga nakakita sa Dios, kondili ang Bugtong Anak sa Amahan mao ang nagpaila Kaniya.” Gipadayag Niya ang Dios, kung unsa ang Dios.

<sup>95</sup> Karon angay man unta nga ginapadayag sa Iyang Iglesia ang Dios, aron ipakita kung unsa gyud ang Dios. Kita n’yo?

Pero unsa ma’y ginabuhat nato? Ginaorganisa ang atong mga kaugalingon, ug, “Wala ko’y unsa man nga kahilambigitan

*kanila*. Methodist sila. Presbyterian sila. Ayaw nakong magkaaduna og unsa man nga kahilambigitan *kanila*. Baptist ako. Pentecostal ako.” Huh! Malaglag gyud kamo, sa ingon niana nga mga hinungdan. Husto.

<sup>96</sup> Kinsa ba ang makapangandak? Si kinsa ba makasulti og unsa man? Tan-awa n’yo ang kaulawan nga gihatud sa mga Presbyterian. Tan-awa n’yo ang kaulawan, sa mga Baptist. Tan-awa n’yo ang kaulawan, sa mga Katoliko. Tan-awa n’yo ang kaulawan, sa mga Pentecostal, mga Nazarene, Pilgrim Holiness. Tan-awa n’yo ang tanang uban pa *kanila*.

Apan, ginahagit ko kamo nga motudlo, kon may kaulawan ba, diha Niana. Oo. May makatudlo ba, sa dihang miingon man ang Dios nga Makagagahum-sa-tanan, “Kini mao ang Akong Anak nga pinalangga nga Kaniya Ako may kalipay nga mopuyo. Patalinghugi ninyo Siya.” Mao kana Siya. Kana Mao ang hingpit.

<sup>97</sup> Karon, mobasa pa kita og dugang dinhi karon.

*Dili usab pinaagi sa dugo sa mga kanding...mga nating baka, kondili pinaagi sa iyang kaugalingong dugo misulod sa makausa nga sa gihapon ngadto sa dapit nga balaan, sa nakab-ot niya ang walay katapusan nga pagtubos... (Nasabtan n’yo ba?)... walay katapusan nga pagtubos alang kanato.*

<sup>98</sup> Dili ingon nga gitubos ra karong adlaw, ug dayon, pagkasunod semana pag magsugod ang rebaybal, tuboson na usab, ug pagkahuman, oh, ma-backslide kita ug tuboson na usab. Gitubos kamo sa makausa ra, hangtud na kana sa kahangturan. Husto kana. Dili nga tuboson, tuboson, og tuboson na pud. “Kondili Eternal nga katubsanan!” “Siya nga nagapatalinghug sa Akong mga Pulong, ug nagatoo Kaniya nga nagsugo Kanako, adunay Kinabuhing Walay Katapusan, ug dili pagahukman sa silot, kondili,” kaniadto pa, “miagi na gikan sa kamatayon ngadto sa Kinabuhì.” Tungod ba kay nakiglamano siya? Tungod ba kay nabautismohan siya sa usa ka paagi? Tungod ba kay may dugo diha sa iyang kamot? “Tungod kay mitoo siya sa bugtong Anak sa Dios.” Sa ingon-anang paagi kita nakaangkon og Eternal nga katubsanan.

<sup>99</sup> Paminaw mo karon.

*Kay...ang dugo sa mga kanding ug mga baka nga toro, ug ang mga abo sa mga dumalaga nga baka nga gisablig sa—sa...gisablig kanila nga mga mahugaw, nagapabalaan ngadto sa pagkahinlo sa unod:*

*Dili ba labaw pa gayud ang dugo ni Cristo, nga pinaagi sa Espiritu nga walay katapusan naghilad sa iyang kaugalingon nga walay buling ngadto sa Dios, naghinlo sa atong kaisipan gikan sa patay nga mga buhat aron sa pag-alagad sa Dios nga buhi?*

100 “Miagi na gikan sa kamatayon ngadto sa Kinabuhi.” Unsa pa ma’y imong kabalak-an sa kung unsay hunahunaon sa kalibutan? Unsa pa ma’y imong kabalak-an sa kung unsay hunahunaon sa imong silingan? Namatay na ang atong kaisipan, ug gibag-o na kita ug natawo na pag-usab pinaagi sa Espiritu sa Dios, aron alagaran ang tinuod ug ang buhi nga Dios. Mao kana.

101 Karon modiritso kita dinha sa ika-10 nga bersekulo, sa ika-10 nga kapitulo, diay, diha mismo sa pikas nga panid.

*... ang kasugoan nga may landong sa mga maayong butang nga palaabuton, ug dili ang matuod nga dagway sa mga butang, uban sa mao gihapong mga halad sa tuig-tuig nga padayon nga ilang gihalad dili gayud makahimo sa p-a-g-h-i-n-g-p-i-t kanila nga nagaduol.*

H-i-n-g-p-i-t, mao kana, “Hingpit.”

*... biyaan tà na ang nahaunang mga tuloohan mahitungod kang Cristo, managpadayon kita ngadto sa kahingpitan; . . .*

*Busa magmahingpit kamo, ingon nga hingpit ang inyong Amahan. . . nga langitnon.*

102 “Ang kasugoan ingon nga maoy landong sa mga maayong butang nga umalabot,” ang tanang mga pagtulon-an ug mga bautismo ug ang. . . ang tanang uban pang mga butang nga aduna sila, “dili gayud makahimo sa paghingpit sa magsisimba.” Ug, bisan pa man, ang gikinahanglan sa Dios “hingpit.”

103 Kon magpamiyembro man kamo sa iglesiang Nazarene, dili kamo mamahingpit. Magpamiyembro man kamo sa iglesiang Baptist, Pentecostal, unsa man kana, dili gayud kamo mamahingpit niana. Kamo ingon nga usa ka maayo, maunongon nga tawo, dili gihapon kamo mamahingpit niana. Walay ni usa ka butang nga magpahimo kaninyo nga takus. Wala gyu’y unsa mang butang kaninyo, nga magpahimo kaninyong takus. Nalaglag man kamo. Moingon mo, “Bueno, ginatuman ko man ang kasugoan. Ginasaulog ko ang sabbath. Ginatuman ko *kini*, ang tanang mga kasugoan sa Dios. Ginabuhat ko *kini*.”

104 Ang ingon ni Pablo, “Ipadaplin na nato ang tanan niana nga mga butang.”

105 “Okey man kana, apan buhaton namo ang *ingon-niini*. Among bautismohan ang mga tawo, ug among pandongan sila og mga kamot alang sa ilang pag-ayo ug uban pa.”

106 Mahimo natong hisgotan kini, bersekulo sa bersekulo, ang matag usa niining mga butanga. Bautismo, nagatoo man tà niini. “May usa ra ka paglaum, usa ra ka Ginoo, usa ra ka Pagtoo, usa ra ka Bautismo.” Nagatoo sàb kita nga may usa ra ka bautismo. Nagatoo pud kita sa pagkabanhaw sa mga patay. Walay pagduhaduha. Nagatoo kita nga namatay si Jesus ug nabanhaw. Nagatoo tà niana. “Pagpandong og mga kamot, para

sa mga may sakit,” mao kana ang gikaingon. “Kini nga mga ilhanan maganunot kanila nga nagatoo. Kung pandongan nila sa ilang mga kamot ang mga masakiton, mangaayo sila.” Nagatoo gyud tà niana.

Apan unsa man kana? Ang ingon ni Pablo, “Ang tanan niana mga patay ra nga buhat.” Butang kana nga inyo rang ginabuhat.

<sup>107</sup> “Karon managpadayon kita ngadto sa kahingpitan.” Oh, my! Paingon na kita sa Tabernakulo, dili sa patukoranan; kondili sa Tabernakulo, sa Tabernakulo Mismo. Kini ang patukoranan: ang kasugoan, ug ang pagkamatarung, ug—ug—ug—ug ang pagpasakop sa iglesia, ug ang mabautismohan, ug—ug ang pagpandong og mga kamot. Ang tanan niana mga kahan-ayan sa iglesia.

“Apan karon managpadayon kita ngadto sa kahingpitan.” Ug adunay Usa lamang nga hingpit, kana mao si Jesus.

<sup>108</sup> Unsaon man nato sa pagpakasulod ngadto Kaniya? “Pinaagi ba sa mga Methodist?” Dili. “Pentecostal ba?” Dili. “Baptist ba?” Dili. “Pinaagi ba sa unsa mang iglesia?” Dili. “Romano Katoliko ba?” Dili.

<sup>109</sup> Unsaon man nato pagsulod Niini? Mga Taga-Roma 8:1.

*Busa karon wala na’y pagkahinukman sa silot niadtong mga anaa na kang Cristo...nga wala nagakinabuhi uyon sa mga butang niining kalibutana, sa unod, kondili uyon sa mga butang nga iya sa Espiritu, og nga wala na panumbalinga kung unsa ma’y isulti sa kalibutan.*

<sup>110</sup> Bisan pa kung nagmasakiton ka, unya moingon ang doktor, “Mamatay ka na,” dili mo kana panumbalingon, dili gyud kana makapabalaka kanimo bisan gamay.

<sup>111</sup> Kung sultihan ka man nila, “Kinahanglan mong mahimong usa ka Katoliko adisir ka maluwas, o usa ka Presbyterian, o kinahanglan buhaton mo ang *ingon-ani*,” dili mo na kana panumbalingon.

“Busa wala na’y pagkahinukman sa silot niadtong mga anaa na kang Cristo Jesus, nga wala nagakinabuhi uyon sa unod, sa mga butang nga ilang makita.” Ang tanan nga makita n’yo sa inyong mga mata yutan-on man.

<sup>112</sup> Apan sa mga butang gayud nga makita n’yo sa inyong espiritu, pinaagi sa Pulong! Ang Pulong mao man ang salamin sa Dios nga nagareplektar kung unsa Siya ug kung unsa kamo. Alleluyah! Oh, my! Kini ang nagasulti kaninyo. Kini lang bugtong Libro sa kalibutan nga nagasulti kaninyo kon diin kamo naggikan, kung kinsa kamo, ug kon asa kamo mapaingon. Ipakita n’yo kanako kon aduna ba’y usa ka panid sa literatura, sa bisan asa, sa tibuok siyensiya o unsa pa man, sa tanang maayo nga libro nga nasulat, wala gyud ni usa niana ang makasulti niini



kaninyo. *Kini* mao ang salamin sa Dios, nga nagapakita kung unsa Siya ug kung unsa kamo. Dayon, sa tunga dinha mao ang linya sa Dugo, nga nagapakita kaninyo kung mamahimong unsa kamo kung buut n'yong mohimo og pagpili. Mao kana.

<sup>113</sup> “Pinaagi sa usa ka Espiritu,” bueno, Unang Mga Taga-Corinto 12. Unsaon man nato pagpakasulod niana nga Lawas?

“Pinaagi ba sa pagpakiglamano?” Dili, sir. “Pinaagi ba sa pagpamiyembro sa iglesia?” Dili, sir. “Pinaagi ba sa pagpabautismo nga pinahayang, pinaatubang? Sa ngalan sa Amahan, Anak, ug Espiritu Santo? Sa Ngalan ni Jesus Cristo? Sa ngalan sa Rosa sa Saron, Lirio sa Kawalogan, Bitoon sa Kabuntagon? Sa unsa man nga gusto ninyo?”

Wala kana’y unsa man nga kahilambigitan niini. “Kana’y pagtubag lamang sa maayong konsensya ngadto sa Dios.” Ug bisan pa niana nagalalisay gihapon kita, ug nagaaway-away, ug nagalantugiyay, ug nagabulagbulag, ug nagahimo og mga panagkalahi. Tinuod. “Apan ang tanan niana mga patay ra nga buhat.” Paingon na kita ngadto sa kahingpitan.

<sup>114</sup> Mga butang kini nga akong ginabuhat. Usa ka ministro ang nagbautismo kaninyo. Kung iya man kamong gibautismohan nga pinaatubang, pinahayang, o makatulo ka higayon, makaupat ka higayon, o usa ra ka higayon, o kung giunsa man niya pagbuhat, wala kana’y unsa man nga kahilambigitan Niini. Gibautismohan lang kamo ngadto sa pagpakig-fellowship sa niana nga iglesia, aron, pamatud-an sa niana nga iglesia: nga nagatoo kamo sa pagkamatay, paglubong, ug pagkabanhaw ni Cristo. Ang pagpandong og mga kamot, aron ayohon ang mga may sakit, maayo man kana, apan, sa natural ra kana tanan, ug mamatay gihapon kanang lawasa sa ingon ka sigurado gayud nga kamo buhi. Mamatay kana usab. “Karon ipadaplin na nato ang tanan niana nga mga butang, ug managpadayon ngadto sa kahingpitan.”

<sup>115</sup> Unsaon man nato pagdangat ngadto sa kahingpitan? Mao kana ang gusto natong mahibaloan.

. . . *gihingpit na ni Cristo* . . .

“Gibutang sa Dios diha Kaniya ang kasal-anan nato nga tanan. Siya gisamaran tungod sa atong mga kalapasan, napangos tungod sa atong mga kasal-anan, ang silot sa atong pakigdait diha sa ibabaw Niya, og tungod sa Iyang mga labod kita nangaayo.” Mao kana ang Lawas nga gitinguha natong sudlan. Mao kana nga Lawas. Ngano man? Kay kung anaa na kamo niana nga Lawas, dili na ninyo makita ang paghukom, dili na gayud kamo makasinati og kamatayon. Kamo’y gawasnon na sa tanang kamatayon, paghukom, sala, ug tanan nang uban pa, pag anaa na kamo diha niana nga Lawas.

<sup>116</sup> “Unsaon man nimo sa pagsulod Niini, magwawali? Pinaagi ba sa pagpasakop niini nga tabernakulo?” Malaglag ka, gihapon.

Dili gani sa pagpasakop, tungod; wala man kita'y bisan unsa nga libro. "Unsaon man nato sa pagsulod Niini? Pinaagi ba sa pagpamiyembro sa usa ka iglesia?" Dili, sir. "Unsaon man ninyo sa pagsulod Niini?" Natawo kamo sulod Niini.

117 Unang Mga Taga-Corinto 12.

*Kay pinaagi sa usa ka Espiritu kitang tanan gibautismohan ngadto sa usa ka lawas, . . .*

118 Ngani pinaagi sa bautismo sa Balaang Espiritu, gibautismohan kita pasulod niana nga Lawas, ug gawasnon na gikan sa sala. Dili na kamo ang makita sa Dios; si Cristo na lang ang Iyang makita. Ug pagnakasulod na kamo niana nga Lawas, dili man mahimong hukman sa Dios kana nga Lawas. Tungod gihukman na man Niya Kana. Giangkong Niya ang mga paghukom kanato ug gidapit kita nga mosulod. Ug pinaagi sa pagtoo, pinaagi sa grasya, misulod kita ug gidawat ang atong kapasayloan. Ug ginapasulod kita sa Balaang Espiritu ngadto niini nga pagpakig-fellowship Kaniya. "Ug dili na kita nagakinabuhi uyon sa mga butang nga iya sa kalibutan, kondili nagakinabuhi na kita diha sa Espiritu."

Gihatagan og kinabuhi, og miabot kanato ang Pulong. Namatay Siya puli kanako. Gibuhi ako. Ania ako, nga patay kaniadto tungod sa sala ug mga kalapasan, pero gibuhi na ako. Ang tanan kong tinguha mao gayud ang alagaron Siya. Ang tibuok kong gugma para lang Kaniya. Ang tanan kong mga lakaw gitinguha kong maanaa sa Iyang Ngalan, nga bisan asa man ako moadto, unsa man ang buhaton ko, ako gyud Siyang mahimaya. Kung mangayam man ako, kung mangisda ako, kung magdula ako og bola, kung—kung ako'y . . . unsa man ang akong ginabuhat, kinahanglan gayud nga, "si Cristo ang ania kanako," nga sa ingon-ana nga kinabuhi, tinguhaon sàb sa mga tawo nga mamahimong ingon niana; dili nagatabi—tabi, nagapanglibak, ug nagalalisay bahin sa inyong mga iglesia. Nasabtan n'yo ba?

"Pinaagi sa usa ka Espiritu gibautismohan kita ngadto niana nga Lawas." "Ug kon makita Ko ang Dugo, molabay Ako ibabaw kaninyo."

119 Paminaw mo. Mobasa pa kita og dugang dinhi, kung mahimo.

*. . . dili gayud makahimo sa paghingpit kanila nga nagaduol.*

"Kondili . . ." ika-2 nga bersekulo, sa ika-10 nga kapitulo.

*Kondili wala ba unta sila moundang sa paghalad?*

120 Kung makapahingpit kana sa tawo . . . Ingon nga kahingpitan ang gikinahanglan sa Dios. Kung ang pagtuman sa mga kasugoan, kung ang pagbuhat sa tanang mga sugo, makahimo pa sa paghingpit kaninyo, nan dili na—dili na unta magkinahanglan og unsa pa man; gihingpit na man gud kamo.

Tungod kay, kon hingpit na kamo, nan Eternal kamo. Tungod, ang Dios lang man ang Bugtong Eternal, ug ang Dios lamang ang Bugtong hingpit. Ug ang bugtong paagi aron kamo mamahimong Eternal, mao ang mahimong kabahin sa Dios. [Blangko nga bahin sa teyp—Ed.]

. . . *sa tapos na mahinloi sa makausa . . . wala na’y pag-ila sa sala.*

Unsa? “Ang magsisimba sa tapos na mahinloi sa makausa, wala na’y *pag-ila* . . .” Kung isulat ninyo ang hubad niana, kana mao’y “tinguha.”

. . . *ang magsisimba sa tapos na mahinloi sa makausa . . . wala na’y tinguha sa sala.*

. . . *kung ang magsisimba tapos na mahinloi sa makausa . . .*

<sup>121</sup> Karon motindog ka ug moingon, “Oh, alleluyah, naluwas na ako kagabii. Pero, bueno, dalaygon gihapon ang Dios, na-backslide man ako tungod sa maong *babaye*. Alleluyah, sa umaabot nga adlaw maluwas ra ako pag-usab.” Ikaw nga makaluluoy’ng wala matudloi og walay kahibalo. Dili man kana ingon niana.

<sup>122</sup> “Ang magsisimba sa tapos na mahinloi sa makausa wala na’y *pag-ila* sa sala,” ang ingon sa Biblia. Paminaw mo, samtang padayon ta nga magbasa, sa makadiyut lang.

*Apan niadtong mga halara . . . nga ginadumdum batok sa sala tuig-tuig.*

<sup>123</sup> Karon basahon nato ang ubos pa, dinha sa ika-8 nga bersekulo, aron makadaginot ta og oras, ug hisgotan na ang gusto kong mahisgotan.

*Sa giingon niana sa itaas, Sa mga halad ug mga gasa ug tibuok mga halad-nga-sinunog . . . alang sa sala dili ka modawat, wala ka usab og kahimuot kanila; nga gihalad sumala sa kasugoan;*

<sup>124</sup> Ika-9 nga bersekulo.

*Unya miingon siya, Ania karon, mianhi ako sa pagbuhat sa imong kabubut-on, Oh Dios. Gikuha niya ang . . . gikuha . . . Gikuha niya ang nahauana, ang kasugoan, aron matukod niya ang ikaduha.*

<sup>125</sup> Aduna lang unta kita’y higayon para pabilin nga maghisgot niana. Samtang nagapabilin ka nga usa ka Presbyterian, o usa ka Pentecostal, o Baptist, o Methodist, wala gyud Siya’y bisan unsa nga mabuhat kanimo. Kinahanglan Niyang tangtangan kana tanan, una, kita n’yo, aron matukod Niya ang ikaduha. Samtang padayon ka nga nagaingon, “Bueno, usa ako ka Methodist.” Ah, hinoon wala man ko’y bisan unsa nga batok sa mga Methodist, o mga baptist, o Pentecostal. Apan, igsoon, dili kana—dili man

kana makapuli niana. Kinahanglan n'yo gayud nga magpadayon ngadto sa kahingpitan, nga makasulod kang Cristo.

<sup>126</sup> Matikdi n'yo kini karon, sa makadiyut lang.

*Nga tungod niini. . . gipanagputli kita pinaagi sa makausa ra ug dayon nga paghalad sa lawas ni Jesus Cristo.*

<sup>127</sup> Huh? Mobasa kita og dugang pa, ug magpabilin sa dinha. Ipatuhop n'yo kana samtang nagabasa kita, "Makausa ra ug dayon."

*Ug ang tagsatagsa ka sacerdote sa pagkamatuod nagatindog sa matag adlaw nga nagaalagad og nagahalad sa masubsub sa maong halad, nga dili gayud makawala sa sala:*

*Apan siya, . . .*

Andam na ba mo? Abli na ba ang inyong saleko karon, aron nga dili kini mosaylo ra, kondili motuhop gyud mismo sa kasingkasing? "Apan Siya." Kinsa man Siya? Dili ang papa sa Roma, dili ang obispo sa iglesiang Methodist, o unsa mang uban pa nga iglesia.

*Apan siya, si Cristo, sa nakahalad na siya sa usa ka halad alang sa sala sa tanang kapanahonan, milingkod sa tuo sa Dios;*

*Gikan niadto nagapaabot siya hangtud nga ang iyang mga kaaway mahimong tumbanan sa iyang mga tiil.*

Matikdi n'yo. Ania pa.

*Kay pinaagi sa usa ka halad g-i-h-i-n-g-p-i-t niya, nga gihingpit niya. . .*

"Hangtud ra ba sa sunod nga rebaybal"? Unsa ma'y sulti dinha?

*. . . nga gihingpit niya sa tanang kapanahonan sila nga gipanagbalaan.*

Nasabtan n'yo ba? "Managpadayon kita ngadto sa kahingpitan."

<sup>128</sup> Karon moingon kamong mga holiness, "Oh, bitaw, nagatoo kami sa pagkabalaan. Alleluyah! Nagatoo kami sa pagpabalaan." Pero inyoha ra man kana nga pagkabalaan. Undangan lang ninyo ang *ingon-ani* ug undangan ang *ingon-ana*. Kabalo man mo nga dili ingon niana ang angay'ng buhaton.

Gawas kon ablihan ni Cristo ang pultahan ug hatagan kini og kinabuhi diha sa inyong kasingkasing, ug mahimo kamong dapit kon diin patay na ang sala, ug pangibog, wala na kana tanan. Dayon, ginatangtang Niya ang inyong kinaugalingong-pagkamatarung, aron mapahimutang Niya ang Iyang Kaugalingon diha kaninyo. "Ug si Cristo kana, ang Anak sa Dios, nga anaa na kaninyo, ang paglaum sa Himaya."

. . . *managpadayon* kita ngadto sa *kahingpitan*;

129 Sa unsa mang paagi kita mamahimong hingpit? Pinaagi sa kamatayon ni Cristo. Dili pinaagi sa pagpamiyembro sa iglesia. Dili pinaagi sa atong maayong mga buhat, nga ginabuhat nato. Maayo man kana. Dili tungod kay nabautismohan kita sa *ingon-ani* nga paagi o *ingon-ana* nga paagi. Dili tungod kay naayo kita, pinaagi sa pagpandong og mga kamot. Dili tungod sa usa man sa mga niini, “Nagatoo kami sa pagkamatay, paglubong, ug pagkabanhaw.”

130 Ang ingon ni Pablo, “Makasulti man ako og mga pinulongan nga iya sa tawo ug sa mga Manulonda,” mga pinulongan kana nga masabtan ug mga pinulongan nga dili masabtan, nga kinahanglan pang hubaron, “wala ako’y kapuslanan. Bisan pa kung aduna ako’y gasa sa kahibalo ug masabtan ko ang tanang kaalam sa Dios,” aron isaysay ang Biblia, gikan sa . . . itakdo kini, “wala ako’y kapuslanan.” Wala diay kaayo’y mahatag nga kaayohan ang pag-eskuwela kung ingon niana, dili ba, aron tun-an ang Biblia? “Bisan kung aduna ako’y pagtoo nga makapabalhin og mga bukid . . .” Ang mga dagkung buluhaton sa pagpang-ayo wala diay kaayo og kahulogan kung ingon-ana, dili ba? “Ako walay kapuslanan. Bisan itahan ko pa ang akong lawas aron pagasunogon ingon nga usa ka halad.”

131 “Oh,” moingon sila, “relihiyoso man kana nga tawo.”

132 “Apan wala siya’y kapuslanan,” ang ingon ni Pablo, “mamahimo gihapon nga walay kapuslanan.”

133 “Kay kon aduna ma’y pagsulti’g mga pinulongan, kini pagahunogon ra unya; kon aduna ma’y mga paghimo’g propesiya, kini igahiklin ra unya; bisan aduna pa’y tanan na niining uban pang mga butang, igahiklin ra unya. Apan kon ang hingpit moabot na, kadto nga sa bahin mahanaw.” Kita n’yo, kanang “hingpit.” Unsa man ang hingpit? Gugma. Unsa man ang gugma? Ang Dios. “Ipadaplin na nato ang tanan niining gagmay’ng mga patay nga buhat ug kasugoan, ug magpadayon ngadto sa kahingpitan.” Nasabtan n’yo ba kini? Ginahingpit kita pinaagi ni Cristo. Unsaon man nato sa pagsulod Niini? Pinaagi sa bautismo sa Balaang Espiritu.

134 “Okey, unsa na ma’y mahitabo?” Miagi na kamo gikan sa kamatayon ngadto sa Kinabuhi.

135 “Bueno, mangurog ba ako, molukso ba, buhaton ba ang ingon-ani?” Dili n’yo—n’yo na, kinahanglan magbuhat pa og bisan unsa. Nabuhat na para sa inyo, gidala na kamo sa Dios gikan sa kamatayon ngadto sa Kinabuhi, ug buhi na kamo. Dayon ang mga bunga sa inyong kinabuhi ang magapakita niini.

136 Daghan kaninyo nga mga Methodist ug mga Nazarene nga nagasinggit sa ingon ka kusog nga mahimo n’yo, pero nagapangawat diay og mais gikan sa umahan sa laing tawo, tinuod kana, ginabuhat n’yo ang bisan unsa na lang.

<sup>137</sup> Daghan sàb kaninyo nga mga Pentecostal ang nagasulti og laing mga pinulongan, nga mora'g nagabubo og gisantes sa uga nga panit sa baka, tinuod, pero nagaadto man lagi mo ug tabanon ang asawa sa ubang lalaki, og ginabuhat ang tanan nang matang sa mga butang. Dili gyud Kini ingon-ana, igsoon.

<sup>138</sup> Ayaw n'yo tinguhaa nga magkaaduna og unsa mang sensasyon o unsa man aron ipuli sa Balaang Espiritu. Pag moabot na ang bag-ong Pagkahimugso, mausab man kamo. Dili n'yo na kinahanglan mobuhat og bisan unsa para pamatud-an kini. Ang inyong kinabuhi mismo ang magapamatuod niini, sa inyong pagkinabuhi. Kamo aduna na'y gugma, pakigdait, pagkamapuanguron, pagkamalulot, kaaghop, pagpailub. Ingon na niana kamo, ug makita sa tibuok kalibutan ang hulagway ni Jesus Cristo diha kaninyo.

<sup>139</sup> Karon, ang pagsulti og laing mga pinulongan, ang pagsinggit, mga bunga ra kana nga naganunot sa ingon niini nga matang sa Kinabuhi.

Ug mahimo gani ninyong, awat-awaton ang maong mga bunga, ug wala gihapon og ingon niana nga Kinabuhi. Makita nato kini. Pila man ang nasayod nga tinuod kana? Oo, nasayod kamo. Nasayod gayud kamo. Grabe! Makita n'yo kini sa tibuok palibot ninyo.

<sup>140</sup> Busa, walay unsa man nga puede n'yong isulti ingon nga maoy ebidensiya sa Espiritu Santo, gawas lamang sa kinabuhi nga inyong gikinabuhi. Karon, kung gusto ninyong mosulti og laing mga pinulongan, maayo man kana kung ginakinabuhi n'yo ang kinabuhi nga mao'y magpamatuod niana. Husto kana. Ug kung gusto ninyong mosinggit, okey lang, maayo kana. Nagasinggit man ako, usab, usahay gani malipay kaayo ko hangtud nga halos dili nako magsul-ob og sapatos; gusto ko lang maglukso-lukso nga dili magsul-ob niana. Ug maayo man kana. Nagatoo ko niana.

<sup>141</sup> Nakakita na ako og mga panan-awon, ug naayo ang mga may sakit, nabanhaw ang mga patay. Sa dihang nagahigda na lang sila didto ug misurender na ang mga doktor ug moingon, "Wala na gyud sila'y paglaum ug mamatay na," manghigda didto sa pipila pa ka oras; ug mokunsad ang Balaang Espiritu ug magpakita og panan-awon, moadto didto ug bangonon ang maong tawo. Ako nang nasaksihan ang mga bungol, amang, ug buta, ug baldado, nga nakalakaw. Dili kana. . . Mga bunga lang kana.

<sup>142</sup> Igsoon, dugay na nga panahon ang milabay, sa wala pa kaniadto magkaaduna og pundasyon ang kalibutan, ang Dios pinaagi sa Iyang Eternal nga grasya, midungaw Siya, ug pinaagi sa pagkahibalo-nang-daan nakita na Niya kamo ug ako. Hingsayran na Niya ang panahon nga atong pagapuy-an. Hingsayran na Niya kung mamahimong unsa kita. Busa,

pinaagi sa pagpili, gipili Niya kita sa wala pa ang pagkatukod sa kalibutan, aron makauban Siya nga walay buling.

<sup>143</sup> Bueno, kung gipili na Niya kita sa wala pa ang pagkatukod sa kalibutan aron maanaa diha Kaniya nga walay buling, ug natawo kita nga puno og buling, ug wala na'y uban pa ang . . . walay unsa man ang may kasarang nga makalimpyo kanato, unsaon na man nato sa pagkahimong walay—unsakon nato sa pagkahimong walay buling? “Gipadala Niya ang Iyang bugtong Anak, aron ang tanan nga nagatoo Kaniya dili magkaaduna og katapusan sa kinabuhi, kondili magkaadunay Kinabuhi nga Walay Katapusan; dili malaglag, kondili may Kinabuhi nga Walay Katapusan.” Kung ingon-ana pagmosulod na kita Kaniya, pinaagi sa pagtoo, pinaagi sa grasya kita naluwas, pinaagi sa Balaang Espiritu nga nagatawag kanato.

<sup>144</sup> Sa wala pa nagkaaduna og usa ka lawas sa niini nga yuta, ang inyong mga lawas ania na napahimutang dinhi. Naglangkob kini og calcium, potash, umog, cosmic—cosmic light, ug mga petrolyo, ug uban pa, dise-sais ka elemento. Ug sugod nga gilumluman sa Balaang Espiritu ang yuta, “nga nagaparayeg.” Ug sa paglumlum Niini, mahibaloan mo na lang, mitungha na ang usa ka gamay'ng bulak sa pasko sa Pagkabanhaw. Dayon naglumlum Siya para motungha ang mga sagbot, ug pipila ka langgam, ug wala magdugay, mitungha na ang tawo.

<sup>145</sup> Bueno, wala Siya nagbuhat og usa ka babaye gikan sa abog sa yuta. Ang babaye anaa na sa lalaki, sa sugod pa lang; ang lalaki ug babaye usa ra. Busa mikuha ra Siya gikan sa kilid ni Adan, og usa ka gusok, ug nagbuhat og usa ka babaye, usa ka kaabag niya. Ug dayon nakasulod ang sala. Dayon human nga nakasulod ang sala . . .

<sup>146</sup> Pero dili man mapildi ang Dios, bisan unsa pa ang mahitabo. Dili gayud Siya mapildi. Dayon, ang mga babaye hinayhinay nga naghimugso og mga tawo sa yuta. Ug ang Dios, pinaagi sa Eternal nga grasya, nakita na kung kinsa ang maluwas, ug gitawag Niya kamo. “Walay tawong makahimo sa pag-ari Kanako, gawas kon pagatawgon siya sa Akong Amahan, una.” “Kini dili kaniya nga nagapaningkamot, o sa kabubut-on sa tawo, kondili sumala sa Dios nga nagapakita og kalooy.”

<sup>147</sup> Moingon mo, “Bueno, gipangita ko ang Dios. Gipangita ko ang Dios.” Dili, dili gyud kamo ang nangita. Ang Dios ang nangita kaninyo. Ingon niana na kini sa sinugdanan kaniadto.

<sup>148</sup> Dili si Adan ang miingon, “Oh Amahan, Amahan, nakasala ako. Hain Ka man?”

<sup>149</sup> Kondili ang Amahan ang miingon, “Oh Adan, Adan, hain ka man?” Ingon-ana ang kinaiyahan sa tawo. Ingon-ana gyud ang tawo. Ingon-ana ang pagkahimo sa iyaha.

<sup>150</sup> “Ug walay tawong makahimo sa pag-ari Kanako, gawas kon pagadanihon siya sa Akong Amahan. Ug ang tanan

nga gikahatag Kanako sa Amahan...” Alleluyah! “Ang tanan nga nagaduol, hatagan Ko sila og Kinabuhing Walay Katapusan, ug pagabanhawon Ko siya sa kaulahiing adlaw.” Pagkamapanalanginon, pagkamapanalanginon gayud nga saad, sa Dios sa Langit! Nga pagahisgotan nato unyang gabii, nga, “Nanumpa Siya sa Iyang Kaugalingon.” Ingon nga wala na ma’y laing labing daku. Ngani nagapanumpa kamo sa usa ka tawo nga mas labaw kay kaninyo. Pero wala na ma’y laing labing daku, mao nga nanumpa ang Dios sa Iyang Kaugalingon. Hisgotan ra nato kana, kung giunsa Niya pagbuhat kana ug kung kanus-a Niya gibuhath kana; nga nanumpa sa Iyang Kaugalingon, nga pagabanhawon Niya kita ug himoon kita nga Iyang Kaugalingong panulondon.

151 Oh, pagkahingpit gayud ug pagkalig-on nga kita makabarug, niining buntaga! Kung unsa nga mahimo n’yong atubangon, kung nagatutok ang kamatayon sa inyo mismong atubangan, may kasarang kamong isulti nga sama ni Pablo kaniadto, “Kamatayon, hain na ang imong ikot? Lubnganan, hain ang imong pagdaug? Apan salamat sa Dios, Nga nagahatag kanato og pagdaug pinaagi sa atong Ginoong Jesus Cristo.” Ingon niana. Ngano man?

152 “Oh, pero nabuhat mo man ang *ingon niani-ug-ingon niana*.”

153 “Kabalo ko, apan natabonan na man ko sa Iyang Dugo.” Alleluyah!

154 “Pinaagi sa usa ka Espiritu, kitang tanan gibautismohan ngadto sa usa ka Lawas.” Kamong mga Methodist, mga Baptist, mga Presbyterian, unsa man kamo, kita gibautismohan ngadto sa usa ka Lawas. Aduna kita’y pagpakig-fellowship, ug mga lungsoranon kita sa Gingharian sa Dios, nagapamahayag nga, “Dili kita taga dinhi niining kalibutana.”

155 Miduol ang akong batang babaye, niadtong miaging adlaw, og miingon, “Daddy, *ingon niani-og-ingon niana* lagi ang gibuhath niadtong batang babaye. Ug *ingon niani-og-ingon niana* ang ilang gibuhath. Miadto kami sa balay. *Ingon niani-og-ingon niana* ang gibuhath nila.” Ingon ko... ang ingon, “Nganong dili man nato ginabuhat ang ingon-ana?”

156 Ingon ko, “Pinangga, dili man gud kita taga dinha niana nga kalibutan. Nagapuyo sila sa usa ka kalibutan nga para sa ilaha mismo.”

157 Miingon, “Dili ba nagalakaw man tâng tanan sa mao ra nga yuta?”

158 Ingon ko, “Sa kalibutan, pinangga. Dili man gud kita usa sa ilaha.”

159 Miingon ang Biblia, “Panggula kamo gikan kanila, magpalain kamo, ang ingon sa Dios.” Kita n’yo, dili man kamo usa sa ilaha. Ug pag moabot na kaninyo ang bag-ong



Kinaiyahan, dili na kamo kinahanglan pang birahon pagawas. Ayaw na kamo nga mobalik pa, sama sa asawa ni Lot. Natawo kamo, nga gawas niana. Ug anaa kamo sa lahi na nga dimensyon. Ug para kaninyo mora na kana ug basura.

Ug kining, bantugan, ug magarbo nga Amerika nga atong gikapuy-an, nahimo na kining usa ka dakung kaguliyang. Ang tanan puro na pagpangibog ug mga babaye. Ug ang mga kababayen-an sa ilang pagpangbisti, ang mga kalalaken-an sa ilang pagpanglihok, ug—ug sa mga butang nga ilang ginabuhat, pero ginatawag gihapon ang ilang mga kaugalingon nga, “mga Cristohanon.”

<sup>160</sup> Ipananglitan na lang nato, kining si Elvis Presley, nga nagatambong ug miyembro mismo sa iglesiang Pentecostal. Siyempre, dinha kon diin. . . si Judas kaniadto nakaangkon og katloan ka buok nga salapi. Si Elvis aduna na’y daghang mga Cadillac, ug—ug pipila ka milyon nga mga dolyares, tungod nga gibaligya niya ang iyang pagkapanganay. Si Arthur Godfrey. Tan-awa n’yo usab.

<sup>161</sup> Tan-awa n’yo si Jimmy Osborne sa Louisville, atua siya nga naga-boogie-woogie, rock-and-roll, sa dunot nga mga kabuang ug kahugawan. Pero pagka-Dominggo sa buntag, may dala nga Biblia ug motindog sa entablado ug magwali. Pagkamakauulaw gayud!

Dili ikatingala nga miingon ang Biblia, “Ang tanang lamesa nangapuno sa sinuka.” Aba, nagapuyo gayud kita sa makalilisang nga adlaw!

<sup>162</sup> Ug moingon pa ang mga tawo, “Oh, sila’y relihiyoso man kaayo.” Oh! Wala ba mo mahibalo nga relihiyoso pud ang yawa? Wala ba mo mahibalo nga ingon gayud ka relihiyoso si Cain sama kang Abel? Apan, wala siya’y Kapadayagan. Mao kana. Wala siya nakaangkon og Kapadayagan.

Oo, nagasimba kitang tanan, pero may pipila lamang ang adunay Kinabuhi, sila kadtong mga adunay Kapadayagan mahitungod kang Jesus Cristo diha sa ilang kasingkasing. Dili pinaagi sa pagpakiglamano, paglukso, dili pinaagi sa pagpamiyembro sa iglesia. Kondili, sa Kapadayagan, nga gipadayag sa Dios si Cristo.

<sup>163</sup> Tan-awa n’yo ang gisulti nga, “Sumala sa sulti sa mga tawo kinsa man Ako, nga Anak sa tawo, kono?”

<sup>164</sup> “Ang uban miingon nga Ikaw ‘usa kono ka propeta.’ Ug ang uban nagaingon nga Ikaw kono si ‘Elias.’ Ug ang uban. . .”

Miingon, “Apan unsa ma’y sulti ninyo?”

<sup>165</sup> Miingon si Pedro, “Ikaw mao si Cristo, ang Anak sa buhi nga Dios.” Dili kadtong gikan sa iyang mga ngabil.

<sup>166</sup> Miingon Siya, “Bulahan ikaw, Simon, nga anak ni Jonas, kay wala kini gipadayag kanimo sa unod ug sa dugo. Wala mo kini

nakat-onan sa kung unsa—kung unsa nga etiko sa Biblia, o sa usa ka pang-teologong seminaryo. Bulahan ikaw, kay wala kini gipadayag kanimo sa unod ug sa dugo. Apan ang Akong Amahan nga anaa sa Langit ang nagpadayag niini. Ug ibabaw niining bato pagatukoron Ko ang Akong Iglesia, ug ang mga ganghaan sa hades dili gayud makabuntog Niini.”

<sup>167</sup> Kung usa ikaw ka Cristohanon, niining buntaga, tungod kay miyembro ka na sa iglesia, malaglag ka. Pero kung usa ikaw ka Cristohanon tungod kay miagi ka na gikan sa kamatayon ngadto sa Kinabuhi, nan dili ka na pagahukman; diha kang Cristo, nagasulod ka sa kahingpitan sa tanang panahon. Wala na’y usa ka butang nga makita ang Dios. Moingon mo, “Bueno, masayup pa ba ako?” Oo, pero wala mo na kana ginabuhat sa tinuyo.

<sup>168</sup> Karon moabot na kita dinha, sa pipila na lang ka gutlo, “Kay siya nga magpakasala sa tinuyo human nga madawat niya ang kahibalo sa Kamatuoran, wala na’y nahibilin pa nga halad tungod sa sala.” Hisgotan nato kana unyang gabii, tungod kay medyo udto na man gud.

<sup>169</sup> Mobasa na lang tà og pipila pa ka bersekulo dinhi, aron mas monindot pa ang atong pagbati sa paghigsot pa nato og diyutay. Sige. Bueno, sugdan dayon nato kana unyang gabii, sa ika-4 nga bersekulo. Paminawa n’yo kini.

*Kay mahitungod niadtong mga nalamdagan na unta sa makausa, ug nahimong. . . ug naka. . . ug nakatilaw na sa gahum, sa langitnong mga gasa, ug nahimong mga umalambit sa Espiritu Santo,*

*Ug. . . nakatilaw na sa maayong pulong sa Dios, ug sa gahum sa kapanahonan nga umalabot,*

*Ug unya mahulog, dili na mahimo ang pagpabag-o pag-usab sa ilang mga kaugalingon. . . ngadto sa paghinulsol; . . .*

Kita n’yo? Ug itakdo nato kana sa Mga Hebreohanon 10, ug balik-balikon, aron maipakita kung unsa gyud kini.

<sup>170</sup> Mga higala, “Managpadayon kita ngadto sa kahingpitan.” Kita. . . wala na kita’y. . . Wala na gyud kita’y ikarason karon. Wala na kita’y ikarason, man lang. Nagpakita na ang Dios sa Langit sa niining kaulahiing adlaw ug ginabuhat ang mao ra mismong mga butang nga Iyang gibuhat kaniadto, kaniadtong ania pa Siya dinhi, kaniadtong ania pa Siya sa yuta. Nagpamatuod Siya, samtang nagatuon kita niining Biblia. Ug kamo—kamo, nga mga magtutuon, nasayod gyud niini, ingon nga nahisgotan na nato ang milagro sa milagro, ug ilhanan sa ilhanan, ug katingalahan sa katingalahan, nga Iyang gibuhat sa mga kaanakan didto sa kamingawan, ang mga ingon-anang butang ug mga ilhanan nga Iyang gibuhat; ang mga butang usab nga Iyang gibuhat kaniadtong ania pa Siya sa yuta, nga nadayag diha sa unod; ug ang mao ra mismong mga butang nagakahitabo

usab karon, dinhi mismo sa atong taliwala. Ania ang Pulong aron panghimatud-an kini. Ania ang butang nga mao'y makasulti nga tinuod kini, aron mamahimong husto kini. Ania mismo ang Espiritu sa Dios aron mamuhat sa mao gihapong butang, busa wala na gyud kita'y ikarason.

Mag-ampo kita.

171 Langitnong Amahan, sanglit ginalibotan man kami sa ingon ka dakung panganod sa mga saksi, among isalikway ang matag pamulong, ang tanan-tanan, ang matag sayup, ang matag dautan nga pulong, ang matag nalitok nga pulong nga di-maayo, ang matag hunahuna, “ug among dalaganon nga mapailubon ang lumba nga gitanyag sa among atubangan, nga magatutok sa magbubuhay ug maghihingpit sa among pagtoo, ang Ginoong Jesus Cristo.” Oh dalaygon ang Iyang pinaka walay-sama ug balaan nga Ngalan! Daw sa unsa nga mianhi Siya sa yuta aron tuboson ang nahulog nga tawo, ug aron ipahibalik sila sa pagpakig-fellowship sa Ginoong Dios. Ug ginapasalamatan Ikaw namo tungod niini. Ug karon pinaagi sa Iyang grasya . . . Dili kami ang nagpili Kaniya, kondili Siya ang nagpili kanamo. Miingon Siya, “Kamo wala magpili Kanako, kondili Ako ang nagpili kaninyo.” Kanus-a man? “Sa wala pa ang pagkatukod sa kalibutan.”

172 Ug, minahal nga Dios, kung aduna ma'y pipila nga ania karong buntaga, nga tingali naglangay-langay niini sulod sa daghang mga katuigan, apan sa kanunay aduna gyu'y diyutay'ng pagtuktok diha sa kasingkasing. Tingali'g nagpamiyembro sila sa iglesia, nagahunahuna nga, “Bueno, mahimong okey ra kini.” Amahan, sigurado gyud, nga naisaysay na kini sa mga Kasulatan niining buntaga: nga dili kami makatago sa luyo sa usa ka iglesia, ug mamahimong matarung; dili usab kami mamahimong maayo, ingon nga wala nagapamakak ug nagapangawat ug nagabuhay ug unsa mang dautan, ug sa gihapon mamahimong matarung.

173 Adunay usa lamang nga pagkamatarung ang ania kanamo, nga dili sa amoa, kondili ang Iyang pagkamatarung. Gihingpit Niya ang among kaluwasan. Busa, ingon nga anaa na diha Kaniya, dili na tan-awon sa Dios ang among mga sayup. Kon makabuhay man kami og unsa man nga sayup, may usa ka Espiritu sa sulod namo, nga nagatuaw, “Oh Dios, pasayloa ako!” Kung ingon-ana dili na kini makita sa Dios. Ug tungod nga, gidala na kami ngadto sa pagpakig-fellowship ug sa grasya uban Kaniya. Itugot kini, Ginoo, samtang ginatapos namo kini nga panerbisyo, sa Ngalan ni Cristo. Amen.

174 Sa makadiyut lang, buut ko kamong hangyoon. Bisan unsa pa ang buhaton ninyo, malaglag gihapon kamo. Paminawa n'yo kini. Usa ka higayon kaniadto . . . tingali'g nasulti ko na kini kaniadto. Ania ang usa ka diyutay'ng kasinatian nga nahitabo kanako.

175 Atua ako niadto sa—sa Toledo, Ohio. Atua ako sa usa ka rebaybal ug—ug nagpahigayon ko og usa ka panagtigum didtong dapita ug daghan kaayong mga tawo. Nasayod man sila sa mga hotel kon diin ako puedeng mo-estar; busa ila akong gidala ngadto sa lungsod. Didto ako nag-estar, sa usa ka gamay'ng motel.

176 Nangaon kami didto sa usa ka gamay'ng Dunkard restawran. Maanindot kadto nga lugar, ang mga gining nga atua didto, Cristohanon gayud ug balaang tan-awon, maligdong ug buutan gayud. Sa miabot na ang Domingo, gigutom na ko. Nagpuasa man gud ko diyutay. Ug gusto kong motabok sa pikas kalsada, aron magpalit og makaon. May usa ka gamay'ng kalsada didto sa may kanto, ug aduna didto'y usa ka regular, ordinaryong, lugar sa Amerika, nga para makan-an. Gamay, gamay ra nga lugar, usa ka restawran, nga abli tibuok gabii. Sa pagsulod ko didto niadto nga Domingo, mga alas dos na kadto sa hapon, sa wala pa ako mibalik aron magwali niadtong hapon, nakurat kaayo ko, nga wala na ko kahibalo kung unsay buhaton.

177 Pagsulod nako, ug ang unang butang nga akong namatikdan mao ang usa ka batan-ong babaye nga mga dise-sais, dise-otso anyos ang panuigon, nga usa ka pinangga sa papa, pinangga sa inahan, og atua didto uban ang usa ka batan-ong lalaki, nga nakagakus ang mga kamot sa hawakan sa maong babaye. Grupo sa mga kabatan-onan nga nagalingkod sa may—sa may taas nga lamesa.

178 Nadungog ko ang usa ka slot machine. Milingi ako *didto*, ug atua didto'y usa ka pulis nga nagagakus sa usa ka babaye, sa may, hawakan sa babaye, ug nagadula og slot machine. Bueno, kabalo man mo nga ilegal ang pagsugal ug ang slot machine didto sa Ohio, kamong mga Buckeye. Ug kabalo mo nga ilegal kana. Ug atua ang tigpatuman sa balaod, pero siya mismo nagadula og slot machine; ug usa siya ka lalaki nga kaedad ko, siguro minyo na, og may mga anak na, tingali'g usa na gani ka lolo. Usa pa gyud ka pulis, nga nagapatrolya, ang nagadula og slot machine. Atua pud didto kadtong batan-ong. . . Unsa ma'y ginabuhat didto sa usa ka batan-on? Unsa ma'y ginabuhat niadto?

179 Atua ako didto. Pero walay nakamatikod nga misulod ako, okupado man kaayo sila, katunga sa ilaha mga hubog na gani. Busa, naniid ra ko. Aduna ko'y nadungog nga miingon, "Bueno, sa tan-aw mo ba madaut kaha sa ulan ang rhuburb?" Ug milingi ako, ug atua didto nagalingkod ang usa ka babaye, tigulang nga babaye, nga . . . Siya'y saisenta'y-singko, setenta anyos na, hapit. Ug ang makaluluoy'ng babaye. . . dili ko mabasol ang si kinsa man nga gustong pinakamaayo gyud ang ilang hitsura. Apan sa dihang siya. . . Gipaanyag niya ang iyang kaugalingon, nga gitina og asul ang iyang buhok, asul gayud. Ug pugdol kaayo, sa may itaas, ug gitina kadto og asul. Ug бага kaayo ang iyang

manikyur, o kon unsa man ang tawag n'yo sa maong butang nga gibutang sa iyang nawong, ug dagkung mga buling. Ug nagasul-ob siya og mubo kaayo nga purol, ug ang makaluluoy'ng tigulang nga babaye nangunot na kaayo ang lawas, nangyatyat na, nangyatyat na nga ingon *niana* ang unod sa iyang mga bitiiis. Ug hubog siya. Nagalingkod siya didto kauban ang usa ka tigulang pud nga lalaki, ug panahon kadto sa ting-init, pero nagasul-ob niadtong karaang, abohon nga overcoat sa sundalo, o berde ang kolor. Gisul-ob kadto nga nakaingon *niana*, ug duna pu'y usa ka dakung panyo nga nakapalibot sa iyang liog. Hubog pud, duha sila, ug kauban nila kadtong luoy'ng tigulang nga babaye.

<sup>180</sup> Nagtindog ako didto ug nagalingi-lingi. Ingon ko, “Dios, giunsa ba nga naagwanta Mo man kana? Unsa—unsa . . . Giunsa ba nga ginatan-aw Mo lang ang ingon niana? Samtang, ako, nga usa ka makasasala nga naluwas tungod sa grasya, nakahunahuna, kon giunsa—giunsa Mo pagtan-aw kana? Aba, mora ba'g pabuthon Mo na ang maong butang. Ang akong batang babaye nga si Rebekah ug si Sarah kinahanglan bang magdaku ilalum sa ingon niana nga matang sa impluwensiya? Ang akong duha ka batang babaye kinahanglan bang makakita sa usa—usa ka popular, dayag kaayo, nga kalibutan sama niini karon, kon diin ang mga tawo nanglihok nga ingon niana? Dios, unsaon man nako . . . unsa ba'y puede kong buhaton?”

Siyempre, tungod ra gyud sa Iyang grasya. Kung sila'y gikatagana-nang-daan sa Kinabuhing Walay Katapusan, nan moduol gyud sila. Kung dili man, nan dili gyud sila moduol. Wala ko mahibalo. Anaa ra kana sa Dios. Buhaton ko lang ang akong bahin.

<sup>181</sup> Nahunahuna ko, “Giunsa ba nga naagwanta pa Nimo kini, Dios? Ingon nga balaan Ka kaayo mahimo man Nimong papason na lang ang maong butang gikan sa yuta.” Ingon ko, “Tan-awa kanang makaluluoy nga lola nga nagalingkod dinha. Tan-awa kanang batan-ong babaye nga anaa dinha. Ug ania ang usa ka babaye nga nagatindog dinhi, tingali'g baynte-singko anyos ang panuigon. Ug ang maong pulis nga nakagakus ang iyang mga bukton diha sa hawak sa babaye, samtang nagadula og slot machine. Ug *atua* siya nga mao unta ang balaod; impas na gyud kini nga nasud. *Atua* ang pagka-inahan nga impas na. *Atua* ang pagka-tigulang nga impas na. Ug *atua* ang batan-ong babaye nga nagalingkod dinha, ug impas na pud siya. Tan-awa ang mga batan-ong lalaki, sa dihang *atua* man unta sila sulod sa simbahan o kon asa man.”

<sup>182</sup> Ingon ko, “Oh, Dios, unsa ba'y mahimo kong buhaton? Ug ania ako dinhi niining siyudara, nagatuaw sa tibuok kong kasingkasing, ug ginabalewala ra nila kini ug ginalabyan ra nga mora ba sila . . .” Nahunahuna ko, “Bueno, Dios?”

183 Bueno, niadtong tungora misantop ang usa ka hunahuna, “Kung wala Ko sila gitawag, unsaon man nila sa pagduol? Ang tanan nga gikahatag Kanako sa Amahan magaduol. ‘Aduna ka’y mga mata apan dili ka makakita, may mga dalunggan pero dili ka makadungog.’”

184 Nahunahuna ko, “Bueno, kung moanhi sa lungsod ang Presidente imbis nga sa rebaybal, ang tanan manganhi gyud siguro. Oh, sigurado, sa kalibutan man kana.”

185 Dayon nahunahuna ko, “Bueno, Dios, giunsa, nganong dili na lang man Nimo paadtoon, paanhion, ipadala si Jesus ug matapos na kini? Nganong dili na lang—lang man paanhion ug para taposon kining tanan, ug kalimtan na kini?”

186 Pagkahuman sugod kong nakita ang usa ka butang nga nagatuyok-tuyok sa akong atubangan. Mora kadto og gamay’ng alimpulos nga nagatuyok-tuyok nga nakaingon *niini*. Padayon ko lang nga gitan-aw kadto. Nakita ko ang usa ka kalibutan nga nagatuyok ug nagatuyok. Gitan-aw ko kadto, ug didto adunay ginawisik-wisik. Mitan-aw ako, ug mapula kadto nga ginawisik-wisik, bug-os ka mapula nga Dugo, nga, nagalibot sa tibuok kalibutan; sama ra sa usa ka alimpulos nga nagatuyok-tuyok, nga mora’g usa ka kometa, ug nagatuyok-tuyok kadto nga ingon *niini*. Ug gitan-aw ko kadtong alimpulos. Ug sa ibabaw mismo niadto, nakita ko si Jesus diha sa panan-awon. Nagadungaw Siya. Ug nakita ko ang akong kaugalingon nga nagatindog dinhi sa yuta, ginabuhat ang mga butang nga dili ko unta angay’ng buhaton. Ug sa matag higayon nga makasala ako, siguradong patyon na unta ako sa Dios, “Tungod kay, sa adlaw nga kamo mokaon niini, kana nga adlaw kamo mamatay.” Ug kana man ang gikinahanglan sa pagkabalaan ug pagkamatarung sa Dios, ug kinahanglan mong mamatay. Ug dayon mitan-aw ko didto. Sige kong gilugod ang akong mga mata. Ingon ko, “Wala ako . . . Dili man ko tulog. Ako’y . . . Usa kini ka panan-awon. Sigurado ako nga usa kini ka panan-awon.”

187 Padayon ra kong nagatan-aw, samtang nagatindog ko sa may luyo sa pultahan. Ug nakita ko nga mitungha ang kaugalingon kong mga sala. Ug sa matag higayon nga mobunggo ang mga niini ngadto sa Trono, ang Iyang Dugo ang nahimong mora’g pangsagang nga iya sa sakyanan. Ginasagang Niini kadto, ug nakita ko Kini nga ginatay-og, ug nagadagayday ang Dugo diha sa Iyang nawong. Ug nakita ko Siya nga gipataas ang Iyang mga kamot, ug miingon, “Amahan, pasayloa siya, wala siya nahibalo sa kung unsay iyang ginabuhat.”

188 Nakita ko ang akong kaugalingon nga adunay lahi na pud nga ginabuhat, natay-og na usab Siya niadto, sa pagsagang. Sigurado gyud, nga gipatay na unta ako sa Dios niadtong tungora mismo, apan ang Iyang Dugo ang nagasagang kanako. Ginababagan Niini ang akong mga sala. Nahunahuna ko, “Oh

Dios, ako ba ang nagbuhat niadto? Sigurado nga dili ako.” Pero ako gyud diay.

<sup>189</sup> Dayon milakaw na ko nga nakaingon *niini*, sama sa pagsulod ko niadto nga lawak, ug milakaw ako paduol Kaniya. Nakita ko ang usa ka libro nga napahimutang didto, nahisulat didto ang akong ngalan, ug tanan nang nahisulat didto sa itum nga mga letra. Ingon ko, “Ginoo, pasayloa ako nga nabuhat ko kini. Ang ako bang mga sala ang nagpahinungdan nga gibuhat Mo kana? Ako ba ang nagpahinungdan nga nagatuyok-tuyok ang Imong Dugo sa tibuok kalibutan? Ako—ako ba ang nagbuhat niini sa Imoha, Ginoo? Pasayloa gyud ako nga nabuhat ko kini.” Ug mituyhod Siya. Ingon ko, “Mapasaylo Mo ba ako? Wala ko gayud tuyoa. Akong . . . Kanimo, pinaagi sa Imong grasya, paningkamotan kong mahimong mas buutan nga anak nga lalaki kung tabangan Mo lang ako.”

<sup>190</sup> Gialsa Niya ang Iyang kamot ug gibutang sa Iyang kilid, gigamit ang Iyang tudlo ug misulat “gipasaylo na” sa akong libro; dayon gilabay kadto sa Iyang luyo, sa Dagat sa Pagkalimot. Gitan-aw ko kadto sa makadiyut. Ug miingon Siya, “Karon, gipasaylo Ko ikaw, apan gusto mo siyang hukman.” Kita n’yo? Miingon pa, “Gipasaylo ka na, apan unsa na man siya? Gusto mo nga pabuthan dayon siya. Dili mo gusto nga mabuhi siya.”

<sup>191</sup> Nahunahuna ko, “Oh Dios, pasayloa ako. Wala ko gituyo nga hunahunaon kana. Dili ko man gusto nga buhaton kana. Ako—ako—dili ko gayud gusto nga buhaton kana.”

<sup>192</sup> “Gipasaylo ka na. Maayo na ang imong gibati. Apan unsa man siya? Gikinahanglan niya kini, usab. Gikinahanglan niya kini.”

<sup>193</sup> “Bueno,” nahunahuna ko, “Dios, unsaon ko man pagkahibalo kung kinsa gyud ang Imong gitawag, ug kung kinsa ang wala Mo gitawag?” Buluhaton kong sultihan ang matag usa.

<sup>194</sup> Busa, sa dihang mibiya na kanako ang panan-awon, miduol ako niadtong babaye. Ingon ko, “Kumusta ka, gining?” Ug kadtong duha ka lalaki miadto man sa kasilyas. Ug sila . . . Nagalingkod siya didto, nga mora’g ginasad-ok, kabalo na mo, tungod sa pagkatawa. Atua sa lamesa ang botelya sa whiskey, o beer, diay, mga ilimnong-makahubog didto, kon diin sila nagainom. Miduol ako. Ingon ko, “Kumusta ka?”

Ug ingon siya, “Oh, hello.”

Ug ingon ko, “Mahimo ba akong molingkod?”

Ingon siya, “Oh, duna man ko’y mga kauban.”

Ingon ko, “Dili ingon niana ang buut kong ipasabot, igsoon.”

Mitan-aw siya sa ako sa dihang gitawag ko siya og “igsoon.” Ingon siya, “Unsa ma’y imong gusto?”

Ingon ko, “Mahimo ba akong molingkod sa makadiyut?”

Ingon siya, “Sige.” Ug milingkod ako.

Gisultihan ko siya sa nahitabo. Ingon siya, “Unsa ma’y ngalan nimo?”

Ug ingon ko, “Branham.”

Ingon siya, “Tkaw ba kadtong tawo dinhi niining arena?”

Ingon ko, “Oo, ma’am.”

<sup>195</sup> Ingon siya, “Dugay na unta kong gustong motambong dinha.” Ingon siya, “Mr. Branham, midaku man ko sa usa ka pamilyang Cristohanon.” Ingon siya, “Aduna ko’y duha ka anak nga mga batan-ong babaye nga Cristohanon. Apan may ingon-ani, ingon-anang mga butang nga nahitabo,” ug mipaingon siya sa sayup nga dalanon, o nagasugod na.

<sup>196</sup> Ingon ko, “Apan, igsoon, dili ko igsapayan, nagalibot pa man gihapon ang Dugo sa imoha. Natabonan pa sa Dugo kining kalibutana.” Kung wala na Kini nagalibot, nan gipamatay na unta kita sa Dios, ang matag usa kanato. Iyang. . . Pag nawala na ang Dugo, bantay mo sa paghukom. Apan sa karon, kung mamatay ka nga wala kanang Dugo, mopaingon ka nianang laing dapita, nan wala na’y mamuhat para kanimo. Sa karon nagapulì pa ang Dugo para kanimo. Ingon ko, “Gining, sigurado gayud, natabonan ka pa gihapon sa Dugo. Samtang aduna ka pa’y gininhawa sa imong lawas, natabonan ka sa Dugo. Apan moabot ang adlaw pag mobiya na dinha ang gininhawa, mogawas na ang kalag, molagpas ka na nianang Dugo, ug wala na gayu’y unsa man kondili paghukom na lang. Samtang aduna ka pa’y kahigayonan para sa kapasayloan. . .” Ug gihawiran ko siya sa kamot.

<sup>197</sup> Nagahilak siya, miingon, “Mr. Branham, nagahubog-hubog man gud ko.”

<sup>198</sup> Ingon ko, “Wala kana’y problema. *May sa kung unsa* nga nagpasidaan kanako nga moduol para sultihan ka.” Ingon ko, “Ang Dios, sa wala pa ang pagkatukod sa kalibutan, gitawag ka na, igsoon. Ug nagabuuhat ka og sayup, ug ginapasamot mo lang kini.”

<sup>199</sup> Ingon siya, “Sa hunahuna mo ba Iya pa akong dawaton?”

<sup>200</sup> Ingon ko, “Walay pagduhaduha, dawaton gyud ka Niya.”

<sup>201</sup> Didto miluhod siya, miluhod kami sa tunga-tunga niadtong salog, ug nagpahigayon og usa ka kinaraan nga panagtigum sa pag-ampo. Gihubo niadtong pulis ang iyang kalo ug giluhod ang usa ka tuhod. Nagkaaduna kami didto og usa ka panagtigum sa pag-ampo, niadtong lugara. Ngano man? Gamhanan man ang Dios.

“Ipadaplin na nato kining patay nga mga buhat, managpadayon kita ngadto sa kahingpitan.”



202 Mobiya na kita nianang kahimtangan kon diin kining mga, “Miyembro ako sa iglesia; miyembro ako sa *ingon-ana*,” tapos na kanang tanan. Ug managpadayon kita ngadto sa kahingpitan.

203 Higala kong makasasala, kung wala kanimo ang Dugo karon, nga walay kaluwasan, walay grasya, ang Dugo ni Jesus Cristo nagaabaga pa gihapon kanimo. Moingon ka, “Bueno, okey ra man gihapon ko hangtud karon.” Apan moabot ang adlaw nga mopaingon ka kon diin wala na’y mamuhat para kanimo nianang higayona.

Mag-ampo kita karon, samtang ginaduko nato ang atong mga ulo.

204 Aduna, ba’y, usa dinhi karon nga gustong moingon, “Dios malooy Ka kanako, naamgo ko nga nakabuhat ako og sayup”? Tingali’g nagpamiyembro ka sa iglesia. Okey ra man kana. Apan kung wala mo pa nadawat ang grasya ni Cristo, mahimo mo bang ipataas ang imong kamot, moingon, “Iampo ako, Igsoong Branham”? Panalanginan ka sa Dios, mister. Panalanginan ka sa Dios, gining. Husto kana. Ayaw. . . Panalanginan ka sa Dios, sir, dinha sa luyo. Panalanginan ka sa Dios, ug ikaw pud. Dinha sa luyo, oo, panalanginan ka sa Dios. Ipataas lang ang imong kamot. Husto kana. Ipataas lang ang imong kamot ug moingon, “Dios, malooy Ka kanako.”

205 Moingon ka, “Miyembro ako sa iglesia, Igsoong Branham. Oo, ako—nankingamot man kong mamahimong maayo, apan wala ko kabalo, daw sa, mora ba’g, dili nako mahimo kana.” Oh, makaluluoy’ng magpapanaw, makaluluoy’ng nagmaluyahon nga higala, wala pa gayud nimo nakita ang panan-awon.

206 Moingon ka, “Igsoong Branham, nakasinggit ako. Nakasulti ako og laing mga pinulongan. Nabuhat ko kining tanan.” Mahimong tinuod kana, usab. Maayo kana, wala ko’y unsa man nga ikasulti batok niana.

Apan, minahal kong, nahisalaag nga higala, ang, pagsulti og laing mga pinulongan, o ang pagkurog, o ang pagpakiglamano, o ang mabautismohan, kana, maayo man kana. Apan, ang maila Siya, mao’y maila gayud ang Persona. “Ang maila Siya mao’y Kinabuhi.”

207 Moingon mo, “Batid ako sa Biblia, nasayod gyud ko.” Bueno, ang mahibaloan ang Biblia, dili mao ang Kinabuhi. “Ang maila Siya,” personal nga puli-ngalan, “ang maila Siya, si Cristo,” ang mahibaloan mong gipasaylo ka na Niya.

Mahimo n’yo bang ipataas ang inyong mga kamot, pag-usab, aduna pa ba? Panalanginan ka sa Dios, gining. Panalanginan ka sa Dios, sir. Panalanginan ka sa Dios dinhi dapit, igsoon. Panalanginan ka sa Dios dinha sa luyo, batan-ong lalaki. Panalanginan ka sa Dios dinhi, igsoon. Panalanginan ka sa Dios, dinha dapit, sa luyo. Husto kana. “Ang maila Siya, mao’y Kinabuhi.”

“Igsoong Branham, hinumdumi ako. Karon ako, dinhi mismo sa akong gilingkoran, ginadawat ko na si Cristo.”

208 Moingon, “Sumulod Ka sa akong kasingkasing, Ginoong Jesus, ug ihatag kanako ang pakigdait, ang pagkamalulot.” Nagasimba ka man, nagatugtog og musika kutob sa mahimo mo, nagasayaw-sayaw, nagadagan-dagan dinha sa pasilyo; pero pag-uli, nagakabalaka, ug naga-usab-usab, ug nagakalibog, dili kana si Cristo. Mosimba ka, molingkod ug maminaw sa usa ka hamubong wali mahitungod sa kung unsang paagi pinturahan ang tulay, o *mora’g ingon niana*, og dili ang Pulong ang napatalinghugan. Ang Pulong ang nagahatid og Kinabuhi. Kini ang Binhi. Wala ba mo magtinguha og pakigdait?

209 Nabalaka ba kamo nga mamatay? Kung atakihon kamo sa kasingkasing karon, mabalaka ba kamo niini? O magasadya ba kamo, nga moingon, “Makauban ko na si Ginoong Jesus sa katapusan niini nga panaw”? Naila n’yo ba Siya? Kung wala pa, ipataas lang ang inyong kamot. Mohangyo kami og pag-ampo para kaninyo. Oo, igsoong lalaki, ikaw, usab.

210 Sige, diha sa inyong kasingkasing karon.

Just as I am, without one plea,  
But that Thy Blood was shed (para kang kinsa?)  
for me,  
Because I promise, I’ll believe,  
O Lamb, O Lamb of God, I come. I come,  
tenderly, mercifully.  
Just as . . .

Duol lang mo mismo ngadto Kaniya, pinaagi sa pagtoo. Toohi n’yo nga nagatindog Siya dinha mismo sa inyong kiliran. Ania Siya mismo nga nagatindog.

. . . ting not  
To rid my soul (sa pipila karon?) of one . . .  
(pagkamainiton sa ulo, pagkamadinauton),  
To Him Whose Blood can cleanse each spot,  
O Lamb . . .

211 “Pinaagi sa pagtoo moduol na ako sa krus, niining buntaga. Itugyan ko na ang akong mga kabug-aton. Nagaduol na ako.” Panalanginan kamo dinha sa luyo. Maayo kana. [Ginalaylay ni Igsoong Branham ang *Just As I Am*—Ed.] Ayaw kamo magmahimong walay-pagpakabana karon. Sa mainiton gayud, nga may kalulot, dumool kamo mismo ngadto sa krus.

212 Sa Daang Tugon, nagadala sila kaniadto og karnero. Nahibalo sila nga nakasala sila, nasayod sila niana tungod sa mga kasugoan. Nasayod na sàb kamo niini karon, tungod kay nanulti man ang Dios sa inyong kasingkasing. Pagtan-aw nila sa mga kasugoan, “Dili ka manapaw. Dili ka magbuhat og *ingon niani-ug-ingon niana*.” Ug mokuha sila og karnero, moadto ug

ipatong ang ilang mga kamot diha sa karnero, og luglogon na sa sacerdote. Magsipa-sipa ang gamay'ng hayop, ug modagayday ang dugo niini, ug magahilak, ug maghimalatyon. Malukop og dugo ang mga kamot sa maong tawo. Namatay ang karnero nga puli kaniya, apan mogawas siya nga anaa sa gihapon ang mao rang pangibog nga buhaton kadto pag-usab.


<sup>213</sup> Apan sa niini nga bahin, nagaduol kita pinaagi sa pagtoo, pinaagi sa grasya. Ingon nga gitawag kita sa Dios. Ginapatong nato ang atong mga kamot nganha sa ulo sa Cordero sa Dios. Madungog nato kadtong pagdukdok sa martilyo. Madungog nato kadtong Tingog, "Gihaw Ako; hatagi Ako og mainom. Amahan, dili Mo unta sila pagsang-atan niini nga sala; wala sila nahibalo sa kung unsay ilang ginabuhat." Kita n'yo? Pinaagi sa pagtoo, mabati nato ang Iyang pagkamatay didto nga kita unta ang mamatay. Sa kinahiladman sa atong kasingkasing miabot ang halawom, makapahiluna nga pakigdait, sa dihang miingon ang usa ka Tingog, "Gipasaylo ka na karon. Lakaw ug dili na magpakasala pa." Daw sa unsa, nga pinaagi sa grasya, dinha, magalakaw kita nga wala na ang kanhing pangibog, kondili ang usa na ka tinguha nga dili na magpakasala pa o mobuhat og unsa man nga sayup. Ang pakigdait nga labaw sa tanang pagsabot, misulod na sa atong kasingkasing.

Hinaut nga dawaton ninyo Kini karon samtang magaaampo kita, ang tanan, nga magkadungan.

<sup>214</sup> Langitnong Amahan, nagaduol sila pinaagi sa pagtoo, pinaagi sa grasya. Adunay mga usa ka dosenang mga kamot ang gipataas. Mga bunga kini sa Mensahe. Nagaduol sila Kanimo. Nagatoo sila. Nagatoo ako kanila, usab, Ginoo. Nagatoo ako nga, tinuod gayud, nga nanulti kanila ang Balaang Espiritu. Ug pinaagi sa pagtoo nagasaka na sila karon sa hagdanan ni Jacob, ngadto mismo sa tiilan sa krus, dinha ginapahimutang ang ilang mga sala, ug nagaingon, "Ginoo, bug-at na kaayo kini para nako. Dili ko na kini mapas-an pa. Ug mahimo ba nga kuhaon Mo ang pas-an kong kasal-anan, ug kuhaon ang pangibog sa akong kasingkasing nga buhaton ang ingon-anang butang? Ug itugot kanako, pinaagi sa pagtoo, niining adlaw, nga dawaton Ka ingon nga akong personal nga Manluluwas. Ug sukad karon, mosunod na ako Kanimo sa matag milya sa dalanan, hangtud sa katapusan sa panaw. Nakita ko na kung unsa ang buut ipasabot sa 'magpadayon ngadto sa kahingpitan,' nga dili diay og pagadto sa simbahan, ug mga gigikanan sa patay nga mga buhat sama sa mga bautismo ug uban pa. Apan gitinguha ko gayud nga magpadayon, hangtud nga mawala na ako, ug mahimo na si Cristo nga mopuyo nganhi kanako."

<sup>215</sup> Oh Jesus, itugot kini sa matag mahinulsolon nga kasingkasing, niining buntaga. Ang matag usa nga nagpataas sa ilang mga kamot makadawat unta og Kinabuhing Walay Katapusan tungod kay gisaad Mo man kini. Dayag ang ilang

pagdawat. Gipataas nila ang ilang mga kamot. Ilang gibatokan ang tanang balaod sa grabitasyon. Gipabati nila nga maulaw ang siyensiya tungod sa ilang kaugalingon, tungod kay ang ingon sa siyensiya, “Kinahanglan nga nakaubos ra ang inyong mga bukton.” Magpamatuod ang bisan unsa man sa siyensiya, nga kinahanglan magpabilin ra kana nga nakaubos sa yuta, tungod kay ginapaubos kana sa grabitasyon. Apan adunay espiritu sa sulod nila nga mao’y nagdesisyon, ug ilang gibatokan ang balaod sa grabitasyon ug gipataas ang ilang mga kamot. Nakita mo kini, Ginoo. Gipahimutang Mo na ang ilang ngalan diha sa Libro. “Gipasaylo na.” Ang kanhing libro nahibalik na karon sa Dagat sa Pagkalimot, og dili na gayud mahinumduman pa. Itugot nga managpadayon sila karon, nga mga mahigugmaon, malulot nga mga Cristohanon, nga nagapangalagad diha Kanimo. Ug tingali daghan ang wala nagpataas sa ilang kamot, itugot usab kini kanila.

<sup>216</sup> Itugot nga magkinabuhi gayud ang maong mga balaan nga mas haduol pa, Ginoo, kay usa ka adlaw nga mas nagakahaduol pa kami sa among Pagpauli kay sa kagahapon. Mag-uban Ka kanamo, Ginoo, kay amo kining ginapangamuyo sa Ngalan ni Cristo ug alang sa Iyang kahimayaan. Amen. 

*MGA HEBREOHANON, KAPITULO SINGKO UG SAIS 1* CEB57-0908M

(Hebrews, Chapter Five and Six 1)

SERYE SA LIBRO SA MGA HEBREOHANON

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Septyembre 8, 1957, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)